



真誥卷之十一

梁華陽隱居陶弘景撰

明震維居士俞安期釋

稽神樞第一

金陵者洞虛之膏腴句曲之地肺也履之者

萬萬知之者無一保命君受作此言按受此應在乙丑年六月巳前甲

子歲中事始論此山受福之端也其地肥良故曰膏腴水至則浮故曰地肺歷世遊踐莫

有知其句曲山源曲而有所容故號為句容

里過江一百五十里訪索即得凡此後紫書大字者並茅

三君傳所記也傳既以寶秘見之者稀今謹抄取說山事共相證顯按山形宛曲東西迥迴故曰句曲從山嶺分界西及北屬句容東及南屬延陵句容既立為縣故其里不復存昔時應在述墟左右耳今山去石頭江水步道一百五六十里

陵之左右間小澤澤東有句曲之山是也此蓋

呼秣陵之金陵非地勝之金陵矣小澤即謂今赤山湖也從江水直對望山東西左右正

自如也此山洞虛內觀內有靈府洞庭四開穴

岫長連古人謂為金壇之虛臺天后之便闕

清虛之東窻林屋之隔沓衆洞相通陰路所

適七塗九源四方交達真洞仙館也此論洞天中諸

所通達天后者林屋洞中之真君位在太湖苞山下龍威丈人所入得靈寶五符處也清

虛是王屋洞天名言華山形似已故以句曲陽與此並相貫通也

為名焉今登中茅玄嶺前後望諸峰壘盤紆曲轉以大茅為首東行北轉又折西

行北轉又折東北行至大橫反金陵者兵水覆南北狀如左書已字之形

不能加災癘所不犯河圖中要元篇第四十

四卷云句金之壇其間有陵兵病不往洪波

不登正此之福地也爾心悟焉是汝之幸復

識此悟從誰所感發耶此河圖者舜禹所受及洛書之屬今猶有

四十餘卷存此語亦是示長史言相句曲山感悟乃從揚君宣說吾之所啓發矣

其間有金陵之地地方三十七八頃是金陵之地肺也土良而井水甜美居其地必得度世見太平河圖內元經曰乃地肺土良水清句曲之山金壇之陵可以度世上昇曲城又河書中篇曰句金之山其間有陵兵病不往洪波不登此之謂也

後所稱河圖即是前要元篇語雖山壇字異其理猶同此蓋指論金陵地肺一片地能如此耳其餘處未必有所免辟耳金陵古名之為伏龍之地河圖逆察故書記運會之時方來之定名耳至於金陵之號已二百餘

年矣

尋金陵之號起自楚時至秦皇過江厭氣乃改為秣陵漢來縣舊治小丹陽今猶呼為故治也晉太康三年割淮水之南屬之義熙九年移治闕場元熙元年徙還今處此是江東之金陵耳傳所言二百餘年者是吳孫權使人採金屯居伏龍山因名金陵自然響會所以歎句曲山秦時名為句金之壇

然響會所以歎句曲山秦時名為句金之壇河圖之逆兆也

以洞天內有金壇百丈因以致名也外又有積金山亦因積金為壇號矣周時名其源澤為曲水之穴按山形曲折後人合為句曲之山漢有三茅君來治其上時父老又轉名茅君之山三君往曾各乘一白鵠各集山之三

處時人互有見者是以發於歌謠乃復因鵠
 集之處分句曲之山為大茅君中茅君小茅
 君三山焉總而言之盡是句曲之一山耳無
 異名也三茅山隱連相屬皆句曲山一名耳
 時人因事而諭今故有枝條數十作別名舊
 不爾也今以在南最高者為大茅山中央有三峰連岑鼎立以近後最高者為中
 茅山近北一岑孤峰上有聚石者為小茅山
 大茅中茅間名長阿東出通延陵句曲阿西
 出通句容湖就以為連石積金山馬嶺相帶
 狀如球形其中茅小茅間名小阿東西出亦
 如此有一小馬嶺相連自小茅山後去便有
 雷平燕口方嶠大橫良常諸山靡迤相屬垂

至破罍瀆自大茅南復有葑山竹吳山方山
 從此疊障達于吳興諸山至于羅浮窮於南
 海也山生黃金漢靈帝時詔敕郡縣採句曲之
 金以充武庫逮孫權時又遣宿衛人抹金常
 輸官兵帥百家遂屯居伏龍之地因改為金
 陵之墟名也河圖已得之於昔可謂絕妙大今

茅山南猶有數深坑大坎相傳呼之為金井
 當是孫權時所鑿掘也今此山近東諸處碎
 石往往皆有金沙云兵帥仍屯居伏龍今則
 無復有唯小近西有述墟昔乃名木墟今是
 良民述墟前十數里大茅有吳墟村以號而
 言乃欲相似而復不關金陵長史宅西北近
 長隱小岡下乃時有故破瓦器焦赤土甚多
 疑是人居處既經耕墾基域不復存而了無

井亦恐如長史井堙沒耳又小茅大橫不見採金處大茅金井若是復不應頓如此遠居疑昧

金陵之土似北邙及北谷關土堅實而宜禾穀掘其間作井正似長安鳳門外井水味是清源幽瀾洞泉遠沽耳水色白都不學道居其土飲其水亦令人壽考也是金津潤液之所溉耶子其秘之吾有傳紀具載其事行當相示

定錄君受作密令爾許侯北邙山也土色黃黑而肥腴鳳門即長安北門也今所擬金陵地並無土種植及住止鑿井者乃是無知察亦為真靈愛護不使輕得居焉吾有傳紀者即是三茅傳也按長史甲子年書

云未見傳紀則受此書時或在癸亥年中也傳中亦稱良土甘美居之度世故因此而顯

也地處少少耳隱略十餘頃許高而平者六七頃也

七頃也既知其要觀其形勢便朗朗也故不

曲示耳保命君告按傳中云金陵之地方三十七八頃恐是其大垠所至至於實

錄正當十餘頃耳高平者是可住處也會登其地依說觀望自可領畧粗知其處若為仙真度世及種民者無患不自然得至苟其非分徒攜手築室必當諸方不立趣使移去耳悠悠凡猥勿承此強欲居之也

金陵之左右汧谷溪源陵之

左有山也右有源汧名柳谷陵之西有源汧名陽谷名山內經福地誌曰伏龍之地在柳

谷之西金壇之右可以高棲正金陵之福地

也按今呼為柳谷沂者其源出小茅後田公泉而西南流至述墟首入大沂陽谷沂者

今無復其名而長隱山岡後有小沂西流南折亦會述墟首又父老云陽谷沂源乃出中

茅前大茅後數川注合為一沂出山直西行北轉亦會大沂論兩沂相交之內即是此地

大畧東西不得極正故兼以左右為言但今之所云二谷不知即是昔號不雖有耆老相

承傳譯漸失兼沂源迴異不必可指的為據也上古名此山為崗山

孔子福地記云崗山之間有伏龍之鄉可以

避水辟病長生本所以名為崗者亦金壇之

質也是以百代百易非復本名良可歎也按今

小茅東北一長大山名大橫山云本名鬱崗山山即在今所謂伏龍之東世又呼伏龍地

為死蛇崗亦粗有彷彿又見其長而高益呼為長隱隱音於覲切其言可隱障也此崗山

雖多細石亦可居耳近東南取長史宅至雷平間甚有可住處義興蔣員芻等今並立田

舍於崗下近去長史宅四五里越桐柏之金庭吳句曲之金

陵養真之福境成神之靈墟也五倍堯水東

海傾人盡病死武安兵其如予何由我帶近

洞臺之幽門恃此而彷彿耳右弼王王真人受令密示許侯

此即桐柏帝晨所說言吳越之境唯此兩金最為福地者也武安者秦將白起擊趙於長

平一日坑殺四十萬人古來兵傷莫復酷此故別引之為喻斯蓋所謂兵病不往洪波不

登矣既帶近洞天神真
限衛故能令三災不干

右前來至此五條楊書

大天之內有地中之洞天三十六所其第八

是句曲山之洞週迴一百五十里名曰金壇

華陽之天傳中所載至第十天并及豐都五嶽八海神仙遠方夷狄之洞既非

此限並不獲疏出 洞墟四郭上下皆石也上平處在

土下正當十三四里而出上地耳此當是至太山頂為

也言東西四十五里南北三十五里正方平其

內虛空之處一百七十丈下處一百丈下墟

猶有原阜壠偃上蓋正平也向云高處一百七十丈下處一

百丈則中央高四邊漸下今云上蓋正平是言其質平無凹凸處耳非直去如板也亦可是登隴阜之上其內有陰暉夜光日精之

根照此空內明並日月矣陰暉主夜日精主

晝形如日月之圓飛在玄空之中按諸洞天日月皆各

有此名亦小小不同蓋猶是大天日月分精照之既云晝夜便有出沒亦當與今日月同其明晦今大天崖畔了不得窮此小天邊際殆可捫覩日月出入則應有限當是忽然起滅不由孔穴但未句曲之洞宮有五門南兩

便門東西便門北大便門凡合五便門也山今

南大洞卽是南面之西便門東門似在柏枝
 隴中北良常洞卽是北大便門而東西並不
 顯中君告云東便門在中茅東小茅阿口從
 此入至洞天最近而外口甚小又以石塞之
 事具在後則西便門亦當如此正應在今所
 呼作石墳處也柏枝乃有兩三洞口恐真門
 外亦不開此三門精齋尋之自可見爾今南
 便門外雖大開而內已被塞當緣穢炁多故
 也北大洞猶有鬼神去來而真仙人出入都
 不由五門皆歛爾無間設此門者爲示是山
 洞體製或外入應入故耳

虛空之內皆有石階曲出以承
 門口令得往來上下也人卒行出入者都不
 覺是洞天之中故自謂是外之道路也日月
 之光旣自不異草木水澤又與外無別飛鳥

交橫風雲蒼鬱亦不知所以疑之矣所謂洞

天神宮靈妙無方不可得而議不可得而罔

也世人採藥往往誤入諸洞中皆如此不便

疑異之而未聞得入華陽中如左元放之徒是所不論然得入者雖

出亦恐不肯復說之耳

句曲洞天東通林

屋北通岱宗西通峨嵋南通羅浮皆大道也

其間有小徑雜路阡陌抄會非一處也漢建

安之中左元放聞傳者云江東有此神山故

度江尋之遂齋戒三月乃登山乃得其門入
 洞虛造陰宮三君亦授以神芝三種元放周

旋洞宮之內經年宮室結構方圓整肅甚惋
懼也不圖天下復有如此之異乎神靈往來

相推校生死如地上之官家矣今按地域方
面則林屋在

東南羅浮在西南惟岱宗峨嵋得正耳直道
亦當五六千里此路至穎川間便應徑通王
屋清虛天也元放當是為魏武所逼後仍來
後真受乃云清齋五年然後乃得深進內外

宮耳三種芝恐
是下品者也良常北垂洞宮口直山領南

行二百步有秦始皇埋藏白壁兩雙入地七

尺上有小磐石在嶺上以覆埒處李斯刻書

壁其文曰始皇聖德章平山河巡狩蒼川勒

銘素壁若掘即可得始皇所履山川皆祀以

玉璧不但句曲而已從此後墨書皆定錄真
君受以告長史掾寫本

前紙所失恐非起端語尋埋壁時在三茅得
道之前而後乃具見如此明真人無所隔蔽
矣按傳所稱即是登山時但云一雙為異或
應二字雙壁之書亦如禹山所刻作篆跡也

今尋檢其處亦可見
石蓋亦殊自不小也茅山北垂洞口一山名

良常山本亦句曲相連都一名耳始皇三十

七年十月癸丑始皇出遊十一月行至雲夢

祠虞舜於九疑浮江下觀藉柯度梅渚過丹

陽至錢塘臨浙江水波惡乃至西百二十里

從峽中度上會稽祭夏禹望于南海而立石
刻頌秦德於會稽山李斯請書而還過諸山
川遂登句曲北垂山埋白璧一雙於是會群
官饗從駕始皇歎曰巡狩之樂莫過於山海
自今已往良為常也爾乃群臣並稱壽喚曰
良為常矣又鳴大鼓擊大鐘萬聲齊唱洞駭
山澤讚樂吉兆大小咸善乃改句曲北垂曰
良常之山也良常之意從此而名檢外書始
皇三十七
年正月出遊雲夢丹陽浙江上會稽祭夏禹
望南海刻石紀功還過吳渡江來並北海至

瑯琊至平原得病七月丙寅崩於沙丘九月
葬驪山如此之時皆朱有瀆卽是從延陵步
道上取句容江來路仍過停饗設耳非必故
請句曲所以止住山北邊下處遂不進前嶺
且於時亦未驗此山之靈奇祀璧之意者為
通是望山設所以中君云所履山川皆祀以
玉璧也夫號從主人名由地表小君以漢成
帝時受紫書云治于良常北洞蓋內因此成
稱也又檢始皇崩不發喪令車載鮑魚以亂
烝此應夏月中如外書所說相似今依傳言
乃是三十六年十月建亥之月為秦正月為
出游是至雲夢耳不爾則是三十八年秋崩
也未作秦曆不能得定癸丑
是何月中比別更詳正之

王莽地皇三年

七月戊申

此七月二
十四日也

遣使者章邕賫黃金百

鎰銅鐘五枚贈之於句曲三仙君

王莽制金
為貨名鎰

真告

卷之三

九

形如錢無孔重一兩直
錢一千百鎰則百兩也
光武建武七年三月

丁巳此三月二遣使者吳倫賈金五十斤獻

之於三君今並埋在小茅山上獨高處培上

有聚石入地三四尺也此則今小茅山積石上最高處是也此二

事不顯真受中漢明帝永平二年詔敕郡縣修守丹

陽句曲真人之廟按三君初得道乘白鵠在

祈禱靈驗因共立廟於山東號曰白鵠廟每

饗祀之時或聞言語或見白鵠在帳中或聞

伎樂聲於是競各供侍此廟今猶在山東平

阿村中有女子姓尹為祝逮山西諸村各各

造廟大茅西為吳墟廟中茅後山上為述墟

廟並歲事鼓舞同乎血祀蓋已為西明所司

非復真仙僚屬矣中茅山玄嶺獨高處司命君埋西

胡玉門丹砂六千斤於此山深二丈許培上

四面有小盤石鎮其上其山左右當泉水下

流水皆小赤色飲之益人此山下左右亦有

小平處可堪靜舍左元放時就司命乞丹砂

得十二斤耳今此嶺前後甚多大石而山上

左右無正流水東南近下有一

長澗西南近下亦有小水度嶺南隱居住處

近山上有湧泉冬夏無窮而水色不甚覺赤

耳平處可住東西唯當近澗左右為好左氏

右楊書

大茅山中茅山相連長阿中有連石古時名
爲積金山此山中甚多金物其處宜人住可
索有水處爲屋室靜舍乃佳此數處亦任意
耳快可合丹以修上道中茅之前大茅之後
下麓長澗東西亦出山外對館此卽隱居今
所住東面一
橫壟也此壟純絕石石形甚壞奇多穿穴側
傍盤紆下深乃有無底處屢投脆物在中間
玲玲之響久之此云多金物亦當是久來真
仙所投也西南有大石壁聳而坼開內有洞
入數丈漸狹小不復容人乃颯颯有風外數
步便有一湧泉冬夏清流卽下解所資近外
澗口又有一湧泉水勢乃駛上者冬溫而夏
冷今正對邏前小近下復有一穴湧泉特奇

大水大旱未嘗增減色小白而其美柔弱灌
注無窮但限在山西自不得東流耳亦別開
決作東流用之又渡此嶺東南有一石穴水
東流極好其處隱障甚可合丹卽後所云菌
山之前也正患去徑路近車聲人行便是第一
聞今若斷此路不復聽車聲人行便是第一
處方當思爲其宜茅山住止惟有隱居今所
住及南洞口長史宅處乃極好所恨迥曠且
此一山通無虺蝮毒螫時有青蛇都不犯物
虎亦甚少自古來未聞害人山居不問道俗
皆少溫病山德寬容不到險阻但恨無青林
冬夏常鬱如東間諸山耳自隱居往來煥養
成秀於形望大好山出好木并雜藥絕宜松
柏而本無人植不容自生今亦分布歲種之
耳
茅山天市壇四面皆有寶金白玉各八九
千斤去壇左右二丈許入地九尺耳昔東海

青童君曾乘獨颿飛輪之車通按行有洞天
之山曾來於此山上矣其山左右有泉水皆
金玉之津氣可索其有小安處爲靜舍乃佳
若飲此水甚便益人精可合丹天市之壇石
正當洞天之中央玄窻之上也此石是安息
國天市山石也所以名之爲天市盤石也玄
帝時召四海神使運此盤石於洞天之上耳
非但句曲而已仙人市壇之下洞宮之中央
息上也句曲山腹內虛空謂之洞臺仙府也

玄帝時召四海神使運安息國天市山寶玉
璞石以填洞天之中央玄窻之上也東海青
童君曾乘獨颿飛輪之車通按行有洞臺之
山皆埋寶金白玉各八九千斤於市石左右
四面以鎮陰宮之嶺諸有洞天皆爾不但句
曲而已邑人呼天市盤石爲仙人市壇是其
欲少有彷彿而不了了也青童颿輪之迹今

故分明

句曲之山諸記說今悉分明唯天市壇石未知的何所在以論迹而言隱

量正應大茅左右而踐行不見其異處或恐爲土木蕪沒所不論耳按保命趙承每登壇

長嘯風雲立至此則不應在小處長見雲氣出入恒先起大茅北陰此或當高而陰故也夫真人常御九龍左驂名颯右服名歛既履山頂故指乘其右驂今大茅嶺上向東行有路傍山平治狀如人功足通軌轍相傳皆呼此為颯輪迹乃無埋没石壇既未顯金寶亦難測所埋又疑洞天中央玄窻之上不應乃近南門復恐在中茅間邑人耆老亦不復知仙人市壇處自隱居來此山七八年尚未得窮歷踐行而况悠悠之徒令其究竟之耶所以來得遍履者患於無良侶可同登陟之艱獨行又覺踽踽是以遂爾淹稽常所耻恨比日方負杖孤遊庶當委曲所聞所見耳

中茅山東有小穴穴口纔如狗竇劣容人入耳愈入愈闊外以盤石掩塞穴口餘小穿如盃大使山靈守衛之此

盤石亦時開發耳謂之陰宮之阿門子勤齋戒尋之得從此入易於良常洞口其中多沙路曲僻經水處不大便易又道路遠不如小阿穴口直下三四里便徑至陰宮東玄掖門入此穴口二百步便朗然如晝日

此即洞天東門也隱

量乃可知處自未敢輕索入耳前傳云洞宮出土上計十三四里許今此云三四里便至掖門者是近山下已薄而門勢又未平計入門復應向下數里乃得至宮耳入口便明者此為內光出照不必關外日者也大茅山亦有小穴在南面

相似如一謂之南便門亦以石填穴口但精

齋向心於司命又常以二日登山延迎請祝
自然得見吾也誠之至矣陰宮何足不觀乎

左慈復何人耶

此即南面之東便門應在柏枝礮石穴中此礮小穴甚多

難卒分別必須精感得開乃可議入云二日者謂十二月二日依傳說年有兩日恐三月十八日諠譁雜鬧非專請之宜故也左慈以成仙人質見易於俗所以三月清齋便得入洞長史雖擬分高邈而形識猶昧豈可相比此語是欲相獎勵耳長史後答亦作此意仰酬之

三月十八日十二月二日東卿司命君
是其日上要總真王君太虛真人東海青童
合會於句曲之山游看洞室好道者欲求神

仙宜預齋戒待此日登山請乞篤志心誠者

三君自即見之抽引令前授以要道以入洞

門辟兵水之災見太平聖君

按中君書云常以二日登山延

迎請祝即請十二月二日不見道三月十八日者屢有正月中耳今臘月二日多寒雪遠近畧無來者唯三月十八日輒公私雲集車有數百乘人將四五千道俗男女狀如都市之眾看人唯共登山作靈寶唱讚事訖便散豈復有深誠密契願覩神真者乎縱時有至誠一兩人復患此諠穢終不能得專心自達如此抽引乞恩無因得果矣唯隱居所住中巖禁斷清年得無遊雜既去良常山西南垂洞隔嶺人自不知至於此也

有可住處是司命往特別宅處也亦可合丹

司命初過江立宅於此以自蕩滌質對神鬼
今按垂之為言如是邊際此正應在長史宅
後大橫之西今父老相傳言如是邊際此正
應在長史宅後大橫之西今父父相傳乃言
大茅之西北平地棠梨樹間名下薄處言是
司命君故宅耕墾至肥良多見磚瓦故物似
經住止處亦驗烈不可穢犯君此審是則宜
言中茅之西不應遠舉良常大都真人語自
不正的遇所引處便言耳昔時山下遠近諸
處長林榛芳遮天蔽日無處不可隱密即今
斫伐耕稼四通九達山中亦皆顯露時移事
異不復可准乃言未久如此正復五六十
年來漸劇耳良常東南又有可住處其間當有累石
如竈形竈間或有寄生樹樹如曲蓋形此處
至好但恨淺耳雖爾自足此處今亦存但無復有寄生曲樹耳

亦帶北洞流水其左右並近大路洞口西北
所以言淺即今凋迥无復可往也

有一地地小危不安要自足立外靜舍也此今

中以去多荒蕪漸近村墟並不足復居昔時
言去縣小近往來為易又近洞口所以屢及
之耳外靜舍當以俟游賓從憇止非自往修
行之所益知是欲相近之意也顧居士所撰
本此中向近所標精舍地一篇今視掾書者
不以相次乃別出在長史所營宅前耳此後
長史答書道西北地危仍次茵山不句曲之
酬金鄉至室語明知本別受之也

山有名茵山此山至佳亦有金乃可往採入

土不過一二尺耳吾昔臨去時曾埋金於此

欲服金者可住取但當不中以營私累耳人今

不復識呼菌山者尋此山形當如菌孤立亦或困倉之困形如困也按大茅後長阿積金東凹地有一山子獨秀如博山鑪且又近積金山恐此或當是即今多石及樹木但金之所不在指一兩處亦難可尋索唯啓乞垂賜所不論耳意欲營轉鍊之事亦指此山前臨長澗東流水至幽隱有形勢

時銅鼎

古鼎字

鼎可容四五斛許偃刻甚精好

在山獨高處入土八尺許上有盤石掩鼎上

玄帝時命東海神使埋藏於此

此亦當是移安息石時所

埋也今最高處乃多石每吉日遠近道士咸登上燒香禮拜无復草木累石為小壇昔經有小瓦屋為風所倒尋古來帝王並重鼎器者以其兩鉉法日月三足法三才能烹飪熟

成萬物兼自能輕重神變隱顯故也中君後答云鑄羽山之銅以作之諸有洞天皆

爾大茅山下亦有泉水其下可立靜舍近水

口處乃佳當小危不安耳

今近南大洞口有

出下便平比世有來居之者唯宋初有女道士徐漂女為廣州刺史陸徽所供養在洞口

前住積年亡女弟子姓宋為高潔物莫能

居于今尚在元徽中有數男人復來其前而

居至齊初乃敕句容人王文清仍此立館號

為崇元開置堂宇廂廊殊為方副常有七八

道士皆資俸力自二十許年遠近男女互來

依約周流數里解舍十餘坊而學上道者甚寡不過修靈寶齋及章符而已近有一女人來洞口住勤於灑掃自稱洞吏頗作巫師占卜多雜浮假此例亦處處有之大茅東西亦

有澗水有晉末得道者任敦住處合藥竈塘猶存今有薛彪數人居之又有朱法永近小山上快矚良常山對穴口東視小山之嶺其眺而乏水

上有埋銅數千斤以盤石填其上漢時其山下有屈氏家大富財有巨億埋銅器於此于

今在也亦有錢錢在西北小山上向也今此山具

存无知其錢銅處縱有彷彿亦不識尋視此山明地高下敷澗不似經墟村住處恐歲代

久遠勢迹曾得往年三月一日八月八日二

乖異故也此乙丑所受則長史往年書是甲子年中

書按答云直置書於述墟朱家靜中則非因華僑楊君三月一日書云今當墾赤石田日送之也

為往來之階亦竟不就事也復云豈可遐棄

坐觀存沒哉此道自決求真之精誠也心不

在我不可責人使必成之也赤石田今中茅西十許里有大

塘食澗水久廢不修隱居今更築治為田十餘頃長史昔意欲避形迹因作田之階得數

處望靈山而遇旱塘壞竟都不齋而有書云

齋戒也此亦有答明辭奏不可八月八日書

云謹操身詣大茅之端乞特見採錄使目接

溫顏耳聆玉音此語為求道之甚急也得近

書具至心可勤道獎志也司命君自在東宮

又書不應總合德有輕重之故也

司命常住大霍之赤

城此間唯有府曹耳其位有高卑故不宜共

作辭啓二君雖同居華陽而官府各異不得

同紙凡書奏不如口啓吾等已自相知之厚

於此可具鑒其儀格耳

薄書疏亦甚為班班欲停之如何

此是長史輕脫置書

於他家靜中而去恐方將人到又致漏泄真

靈慎密故有此語欲戒試其心事耳長史後

答此言亦此書疏慎示俗人脫有見者掘壞

殆為巧便

靈山爾之罪大也

恐俗人貪狡之徒知此金寶處堪能鑿掘則事由宣

泄此罪真為不輕非但爾時教戒

亦傳貽無窮將來諸子咸共秘之

右定錄中君答長史前書說句曲山事訖

此長史前書無本出今唯有後答亦隨條

奉酬次第如左

右從前良常來凡二十一條並有掾寫

昔年十餘歲時述虛

此乃應是墟字而由來皆作墟字即今之山西

村名也閑耆宿有見語茅山上故昔有仙人乃

有市處早已徙去後見包公問動靜此君見

答今故在此山非為徙去此山洞庭之西門

通太湖苞山中所以仙人在中住也唯說中

仙君一人字不言有兄弟三人不分別長少

不道司命君尊遠別治東宮未見傳記乃知

高卑有差降班次有等級耳輒敬承誨命於

此而改此長史又更答書云今有所起草存故得撰錄而前紙斷失亦非起端語

也包公是鮑靚句容人悉呼作包也答書時已蒙示傳記是乙丑年初矣告小

阿口直下三四里便徑至陰宮東玄掖門入

此穴口二百步便朗然如晝日不審此洞天

之別光為引太陽之光以映穴中耶此洞天

中官府曠大云宮室數百間屋官屬正二仙

君兄弟復有地仙官男女凡有幾許人為直

是石室亦有金堂玉房耶宮室與洞庭苞山

相連不包公及妹朱氏昔在世曾得入此宮

不二人為未得登舉作地下主者耶治在何

處愚昧冒啓懼有干忤包公及妹事前中君書無有當復是別噉

今更重問并洞中事市山之盤石市名之存

由於此也今之孜孜志慕於道無心金玉尊

靈所置唯助令彌密耳豈有掘犯理耶此故

為未之照察也山左右泉水金玉津液其地

亦可立靜舍合丹輒當以為意此上答天市泉水可住事

而竟無所立也不審玄帝是何世耶後生蒙蒙多所

不及願告顯史水王故號玄帝外書亦爾長史脫致疑問耳此條復有答在後

告中茅山東有小穴陰宮之阿門入道差易

後當以漸齋修而尋求之靈宗垂念便以為

造金門而登玉房也但存遲速之間不敢悞

遲有如此教示而不速求游關一告大茅山

亦有小穴在南面相似如一謂之南便門欣

見啓悟喜稟德音精誠注向沐浴自新既聞

吉日至時密造區區之誠靈寔鑒照此道南面之東

門與小阿東門相似者

告左慈復何人也此見獎勗之

言恩念下逮益令欣慕傳上亦載此事告良常西南

垂有可住處是司命君往時別宅亦可合丹

穆自見傳記鄙心竊志欲尋司命君往昔之

舊宇高樓之所托患未能審知耳今輒當隱

量求處臨時告悟傳上亦載此事基陞湮沒難可必審故更乞告示也

告良常東南又有可住處累石如竈寄生樹

如曲蓋為誌往當尋其所告洞口西北有一

地地小危不安可立外靜舍愚意本自欲立

內外靜舍輒當疇量在宜

亦不聞立此外靜事而今有一累石

壇歷然相傳乃言掾於此壇化

心告菌山至佳

司命臨去埋金於此欲服金者可取且竊有

合金液意今未敢議此若山居積年修學日

進後而事可得密者臨時啓質

中君書云吾昔臨去埋金

不道司命長史此答誤耳

告大茅山有玄帝時銅鼎在山

獨高處入土八尺許此帝王之所

器疏示後生益增稟厲承下亦可以立靜舍

感備告悟告昔屈氏埋銅及錢此通非所擬

向也聞此遠事世代變易能不悲歎昔初拜

八月八日書已操身至述虛

此猶是前村

徐汎家

尋家信見報云得應言未可登山便承此而

歸直致此書於朱家靜中耳愚心鄙近亦以

肉人穢濁精誠不懇無能上達不悟已暢高

聽得蒙省察辭與事違悚息而已

長史玄挺動靜聞徹

屑辭所向便已關奏蒙報或是得楊君所傳者徐汎家今猶存後所云徐偶即應是况後

所以知井宅處亦云其祖曾為長史門生也

昔占赤石田利近山

下為往來之階此乃丹誠尋遇天旱佃不收

塘壞穆尋見用出此事力未展非為息懷今

方居山下故當修懇以此去洞口遠故不欲

安耳此田既在大茅中茅之西去大山近瞻

北洞口遠耳此田雖食澗水旱時微少塘又

難立不知後當遂墾之不今塘尚決補築當

用數百夫則可溉田十許頃隱居館中門人

亦於此隨水播植常願修復此塘以追遠跡

兼為百姓告書疏班班欲停之如何凡書疏

之惠也之興所以運達意旨既蒙眷逮親奉觀對司

命君二仙靈顏則天啓其願沐浴聖恩豈復

煩書疏耶所謂得魚而忘筌也此蓋不欲停

之辭故引以

回見於不審左公今何在又有葛孝先亦言

理極好得道今在何處肉人喁喁為欲知之葛既鄉

及問此條亦右長史答書訖此並是自起本多贍治用

右答在後白牋次第如此歲乙丑此一行本題紙背

真誥卷之十一

真誥卷之十二

梁華陽隱居陶弘景撰

明震維居士俞安期校

稽神樞第二

昔累得書見意深照旨趣先書以年行西曷
衰顏待老中夜慨歎莫與酬諮夫誠感有在
亦得之無晚也次書告有年之志疇昔之好
恒願真人稟受要訣仰接容景親奉徽音夫
勤未上徹精未廣釐真要之騁未可豫及也

後漢書云吾發自玄授金闕素名踰邁世迹
超登清虛何玄標之渺邈竒洞之淵遠哉欲
克已洗心沐浴芳流若能斯者今其時矣末
書云厠聞要旨當修五靈自謂西造闔圃東
遊玄洲不爲邈絕求矜而誘之引而致之是
爲言貫于心良可啓矣恭佼五靈亦復至耳
然道浮外迹未關內真是以雲車靈轅相適
猶遐昔曾軫華僑依此而言則知華僑先亦蒙真降矣蓋應會
敖世事有出嘿涂不必靜苟有分無志申公

所病遇至不爲覆水始惋是以古言有云逢
時不邁山客抃粲者矣夫學道者固不宜恃
其質分必當保任於清全矣於焉騁逸松期
回輪紫清靈觀四響玄音合唱玉振雲奏不
謀而和可謂祕道藏珍真暉之上挺也子建
志有年今因以反子昔旨耳此一書似是裴君言且楊書此

亦不與後玄帝相連恐非中君答也又長史此四書本今並不存矣

玄帝者昔軒轅子昌意娶蜀山之女生高陽
德號顓頊顓頊父居弱水之鄉項身陶七河

之津是為玄帝也仗萬靈以信順監衆神以
 導物役御百氣召致雷電於是乘結元之輦
 北巡幽陵南至交趾西濟流沙東至蟠木動
 靜之類小大之神日月所照莫不屬焉四行
 天下周旋八外諸有洞臺之山陰宮之丘皆
 移安息之石封而填之鑄羽山之銅為寶鼎
 各獻以一於洞山神峯不獨句曲一山而已

此所謂玄帝也

此後並中君答前所諮問四
 條事復以闕上紙也說顯頊

與五符語正同五符
 唯無理鼎一事耳

鮑靚靚及妹並是其七

世祖李湛張慮本杜陵北鄉人也在渭橋為
 客舍積行陰德好道希生故今福建於靚等
 使易世變練改氏更生合為兄弟耳根胃雖
 異德蔭者同故當同生氏族也今並作地下
 主者在洞宮中靚所受學本自薄淺質又撓
 滯故不得多也欲知之其事如此亦如子七
 世祖父許肇字子阿者有賑死之仁拯饑之
 德故令雲蔭流後陰功垂澤是以今得有好
 尚仙真之心者亦有由而然也物皆有因會

非徒爾而得之者矣

此書時先生誠事未授所以論及子阿功蔭也

鮑亦通神而敦尚房中之事故云撓滯後用陰君太玄陰生符為太清尸解之法當是主者之最高品矣緣運事乃如此

於變幻而拙於用身今正得不死而已非僊

人也初在長山近入蓋竹亦能乘虎使鬼無

所不至但幾於未得受職耳亦恒與謝稚堅

黃子陽郭聲子相隨

葛玄字孝先是抱朴從祖即鄭思遠之師也少

入山得仙時人咸莫測所在傳言東海中仙人寄書呼為仙公故抱朴亦同然之長史所以有問今答如此便是地仙耳靈

左慈今在

小括山常行來數在此下尋更受職也慈顏

色甚少正得鑪火九華之益

左慈字元放李仲甫弟子即葛

玄之師也魏武父子招集諸方士慈亦同在中建安末渡江尋山仍得入洞又乞丹砂合九華丹九華丹是太清中經法小括即小括蒼山在永嘉橋谿之北凡此諸人術解甚多而仙第猶下者並是不聞三品高業故也許先生所以興歎

句曲有五門

有心立志清齋三月登尋此門皆可即得得

可入但人自不能齋尋之耳來問欲知宮室

所作闊狹多少男女主領人數當更相示來

疏亦復泰盡邪勤自當見亦何事爾亦何事

爾又當先呈啓司命司命令答道宮室之委
曲者吾乃敢言之耳此自是司命之別宮吾

人亦不得爲洞臺之正主也

按後所論諸官僚人物當是已

爲啓司命乃具得受說之耳右定錄後書答
長史所問訖此後玄帝來凡五條並楊書

東卿司命監太山之衆真總括吳越之萬神
可謂道淵德高折衝羣靈者也賈玄道李叔
升言城生傅道流往並受東卿君之要也玄
道河東人周威王之末年生叔升涿郡人漢
元帝時生道流北地人漢靈帝殿中將軍也

城生吳人後漢劉聖公時爲武當郡尉也受
學至勤並得真道今在太山支子小陽山中
此所謂地真者也諸來作試者非一津而往
矣或亦因人犯者此最難了也於斯之際可
不慎乎

此四人隸司命主察試學道者所以

長史有書與賈賈卽呈司命司命亦

答之並以在上卷此諸人名位小不顯外書
周威王卽應是六國時威烈王也于時雖未
立可東郡而卽地已有其名矣漢
官無正殿中將軍或應中郎將也此紫陽真

人六月二十日受

右一條有掾寫

七月十五日夜茅中君受書與許卿即長史也後當

為上清左卿玄感凝會精期遠範標神映挺雙理

自分必能鵬飛辰阿雲扇靈元高振玉宇攜

轡秀真可謂邈乎其奇落絕之視也於是洞

陰之宮內臺下觀風無羽琅之鼓草無瓊金

之流嚮雖淳光正明動回五象固乞屈之夾

觀小天之浮景耳何足絳卿司之至念紆蘭

真以盼汜邪然鑿無不應圓想必通所以興

詠事外迹亦並而苟誠之所企吾無隱也想

善建重離之明以期於必詣之會皓清明朗

賢亦俱學而得耳不令我等有感頰下風矣

弘之而已此是受前書後一月日復受此猶論答欲見洞宮事所以有後說也

善建重離之明如似指魏傳青錄文而長史名字不相應既已稱俯玄仰白在瓊刃前則此別當有

義況也

右一條楊書

定錄官寮有左右理中監準今長史司馬職

又有北河司命主水官考此職常領九宮禁

保侯禁保侯職主領應為種民者今洞宮自二君以下

便次此三職爲大矣

左理中監準大府長史昔用韓崇以居之崇字長季吳郡毗陵人也少好道林屋仙人王瑋玄曾授之以流珠丹一法崇奉而修之大有驗瑋玄語之子行此道亦可以出身仕宦無妨仙舉也崇遂仕稍至宛陵令行仁以爲政用道以撫民虎狼深避蝗不集界遷汝南太守拔書佐袁安安後位至司徒時人通以崇有識物之鑒也陰皇后葬京師近郡二千石妻當會園陵而崇獨居清素妻

忿崇哭泣詔問其故太常馮奚答曰汝南太守韓崇清苦遠尚味道忘形身享重官而妻自紡績政化仁簡視民如傷深達竒博有君子之鑒斯則昏夕之夜光陛下之子產也妻不通寒儉之節哭怨無衣將足以顯崇明德耳上竒之加崇俸祿秩中二千石後孝明皇帝巡狩汝南上治崇府崇使妻出住孤獨老嫗家上聞歎曰韓崇所謂百鍊不銷也賜縑五十匹崇在郡積十四年政化洽著舉天下

最年七十四瑋玄乃授以隱解法得去入大

霍山受瑋玄遁化泥丸紫戶術以度世今在

洞中為左理中監漢書所載事迹亦略同而置辭小異耳袁安字邵平

初為縣功曹被舉歷仕遂至三公和帝時卒即袁紹高祖也晉世又有馮奚亦為太常名

位同耳韓既隱解必是記尸今晉陵上有韓冢崔巍高大從來相呼為韓冢疑如桃君或

即是此虛壙而世呼為孫策將韓當冢也云王瑋玄是楚莊王時

侍郎受術於玉君若是春秋時楚莊王者疑侍郎之官不似古職而漢

楚王又無莊謚右理中監準職如司馬今有劉翊字

子翔者居之翊本潁川人少好道德而家世

大富常周窮困為事好行陰德密惠陳留張

季札當弔師喪車敗牛困翊於汝南界逢之

與語不示名字即推車牛與乘之恤死救窮

非一人矣後都長安翊舉計掾到都帝嘉其

心拜郎中遷陳留太守出長安五百里中斂

死恤窮損已分人行達陽平遂遇馬皇先生

告翊曰子仁感天地陰德神鬼太上將嘉子

之用情矣使我來攜汝以長生之道吾仙官

也爾乃能隨我去不翊於是叩頭自搏少好

長生幸遇神仙乞願侍給馬皇先生因將翊
入洞柏山中授以隱地八術服五星之華法

今度名東華來在洞中為定錄右理中監

漢書

云翊字子相潁陰人家世豐富常能周施而
不以為惠會行於汝南界中有陳留張季札
遠赴師喪遇寒水車敗頓滯道路翊見而謂
曰君慎終赴義行宜速達即下車與之不告
姓名策馬而去季札意其子相也後故到潁
陰還所假乘翊閉門辭行不與相見常守志
卧疾不屈聘命河南种拂臨郡引為功曹後
黃巾賊起翊救給乏絕資其食者數百人鄉
族死亡則為殯斂鰥寡則助其妻娶獻帝遷
都西京舉上計掾爾時道路寇阻翊夜行晝
伏乃到長安上嘉其忠勤拜議郎遷陳留太
守翊又散珍寶唯餘車馬自載東歸出關數

百里見士大夫病亡道次仍又以馬易棺脫
衣斂之又逢故知飢困於路不忍委去因殺
所駕牛以救其乏衆人止之翊曰視沒不救
非志士也遂俱餓死此說大同小異故備載
之論翊字子翔於字例相得而翊義亦是相
相作息亮切音二者未詳孰正馬皇出列仙
傳黃帝時

馬師也 定錄府有典柄執法郎是淳于斟

字叔顯主試有道者斟會稽上虞人漢桓帝

時作徐州縣今靈帝時大將軍辟掾少好道

明術數服食胡麻黃精餌後入吳烏目山中

隱居遇仙人慧車子授以虹景丹經修行得

道今在洞中為典柄執法郎

易參同契云桓帝時上虞淳于

叔通受術於青州徐從事仰觀乾象以處災
異數有效驗以知術故郡舉方正遷洛陽市
長如此亦為小異吳無烏日山婁及吳興十
並有天目山或即是也慧車子無別顯出

二月一日夜定錄君所道此即同是云北河

司命項闕無人昔以桃俊兼之耳俊似錢唐

人少為郡幹佐未負笈到太學受業明經術

災異晚為交阯太守漢末棄世入增城山中

學道遇東郭幼平幼平秦時人久隱增城得

道者也幼平教俊服九精鍊氣輔星在心之

術俊修之道成今在洞中兼北河司命主水

官之考罰此位雖隸定錄其實受事於東華

宮中節度桃俊字翁仲者也漢書無此事今

墳壇歷然苗裔猶存鄉近時聞輦角之響故

人不敢侵毀之皆知呼為桃司命冢錢唐杜

徵士事京產先與隱居共有詩詠以贊張激

子當為太極仙侯激子者河內張奉者也字

公先少時名激子耳此人亦少發名字太傅

袁隗艱其高操妻以女女服飾奢麗奉不顧

皆無異路人婦改服乃後成室家也後棄世

入剡山遇山圖公子山圖公子周哀王時大

夫仙人者也授激子九雲水強梁鍊桂法激子修此得道今在東華宮行爲太極所署也或領九宮尚書與北河侯對職治水考北河司命或爲禁保侯亦併共業故也北河司命亦治在洞天之中與張激子對局

魏書云張範字公儀

河內修武人祖歆漢司徒父延太尉袁隗欲以女妻範範辭不受性恬靜樂道徵命不就後爲議郎參丞相魏武軍事甚見敬重好賑救窮乏家無餘財以建安十七年卒弟承字公先亦知名以方正拜議郎諫議大夫趙郡太守後隨魏武西征至長安病亡此說名字翻覆大異承與奉乃相類而非袁壻若是範又其字不同詳按事迹恐多是兄也魏書王

修傳又云修往來南陽多止張奉舍奉舉家病修營拯之按張範兄弟乃嘗避地往揚州投袁術又非劉表不應在南陽二

中候夫人

所道尋洞中事皆二君所說如此兩條獨是

我聞易遷中人竇氏言云北河司命禁保侯

似有所擬想當審爾竇氏即瓊英也似有所擬者當是長史故中君

受云北河司命方驗也恐受業高後定保命

府多女官司三官官屬有七人四女三男明

晨侍郎七人如今世上御史中丞之職並隸

東華方諸宮保命君總關之耳明晨侍郎周

爰支者漢河南尹周暢伯持之女也暢汝南安成人好行陰德功在不覺曾作河南尹遭大旱收葬洛陽城旁客死骸骨萬餘人為立義冢祭祀之應時大雨豐收所行多是此輩太上處以暢有陰行令爰支從南宮受化得仙今在洞中爰支亦少好道服伏苓三十年後遇石長生教之以化遁化遁上尸解也

周嘉從弟也性仁慈和篤某帝時為河南尹永初二年夏旱久禱無應因收葬萬餘人應明晨侍郎張桃枝者漢司隸校尉

朱寓季陵母也沛人寓往與陳蕃俱誅寓母行陰德久聞在易遷始得為侍郎耳

時入後後同黨人之例李膺杜密俱下獄死非陳蕃同時明晨侍郎夏馥

字子治陳留人也少好道服木餌和雲母後入吳山從赤須先生受鍊魂法又遇桐柏真人授之以黃水雲漿法得道今在洞中馥少時被公府辟召懸辟書著桑樹乃去其用懷

高邁如此後漢及高士傳並云陳留圍人少為書生桓帝時舉直言不就性質

直不同時黨為闖人所疾陷於黨錮之限避難乃翦鬚髮變形逃林慮山中為人治作後

還家杜門不與人相見黨禁未解餘數
而亡赤須子出列僊傳桐柏即古弼王

人不能一二道之例皆取平貞正直體隱神

清即侍郎之才不限男女也前云有七人今唯說二女一男

右保命君所道此當是接中候告後乃言之童初府上帥

用劉文饒文饒者弘農劉寬也少好道曾舉

漢方正稍遷南陽太守視民如子怒不形顏

口無疾言行陰德拯寒困萬民悅而附之如

父母焉後為司徒太尉上賜酒伏地睡詔問

故乃答曰臣任重責大恒憂心如醉且使奴

至市買菜奴盜用錢飲酒晏乃還臥於閣內

又不得菜既醒乃罵之為死狗罵畢即束帶

來入恐奴從後自殺所以慮之不覺忽然睡

耳願見哀恕寬用心仁愛觸類如此矣年七

十三一日遇青谷先生降之於寢室授其杖

解法將去入太華山行九息服氣及授以鑪

火丹方修之道成今在洞中作童初府帥上

侯主始學道者後漢書云劉寬字文饒弘農華陰人父名崎順帝時為司

徒寬為人謹厚常行有人失牛乃就寬車中認之寬無言解駕牛與之步歸頃有誌者得

牛而送還慚懼寬乃謝遣之桓帝延喜八年
 為南陽太守恒用蒲鞭靈帝嘉平五年為太
 尉嘗於御坐被酒睡伏帝問太尉醉邪寬仰
 答臣不敢醉但任重責大憂心如醉耳嘗有
 客來詣寬寬遣奴市酒迂久大醉而還客罵
 為畜產寬須臾遣人視奴疑恐自殺語左右
 曰此是人而罵為畜產為辱孰甚故吾懼其
 死耳後封逮鄉侯六百戶中平二年亡年六
 十六贈車騎將軍時進謚曰昭討侯子松嗣
 按此說復為同異故詳載之青谷先生無別
 顯出凡此諸引教仙人恐皆是
 下教限不爾則不應得輒然

華陽中事當

更示爾正月二十三日東宮上人來看洞中
 時或有龜山賓共集高會真仙之日寧可暫
 登伏龍之鄉以禮拜於靈岫邪可示許侯令

知之

此亦應是中君仍前十二月一日言也
 東宮上人即青童君龜山賓即西王母

上卷亦有此告令登伏龍以望山禮拜便
 異乎陟嶺非必以近易為言恐當宜然也昔

有一人好道而不知求道之方唯朝夕拜跪
 向一枯樹輒云乞長生如此二十八年不倦
 枯木一旦忽然生華華又有汁甜如蜜有人
 教令食之遂取此華及汁並食之食訖即仙
 矣如是用心精誠之至也枯木尚能生紫華
 濯甘津況三秀之靈阿五芝所播植而不能
 數恭山岫洗拔滓穢者良可悲也世人所以

儻此一每不得如意者亦如子所不得如意

耳豈異邪昔有劉少翁曾數入太華山中拜

禮向山如此二十年遂忽一旦得見西嶽丈

人授其仙道禁山符有西嶽君西嶽公不知是此文人邪昔有一

人數旦旦詣河邊拜河水如此十年河侯河

伯遂與相見與其白璧十雙教授水行不溺

法此人見在中嶽得道河侯河伯故當是兩神邪左慈初

來亦勤心數拜禮靈山五年許乃得深進內

外東西宮耳前云三月便得進與此學道當太殊恐以深進為異也

如山世遠去人事如清虛真人步深幽當如

周紫陽何有不得道邪世遠傳未出其捨家尋學事在識書即尹

公度弟子已得為太和山真人清虛王君紫陽周君各自有傳建志當令勤

研神令虛所為所作當令密青童戒南真亦云學道唯須勤

密勤即晝夜而勿怠密則非我而不知今中君復說此實為至論可謂一言以蔽之右

定錄君所道使疏此一條又夫望林者豈不

想易遷之若人羨彼子之濯景邪可謂瞻之

在前忽焉在後長史妻既已在易遷為長史今眺望林嶺豈無羨想之懷昔自謂勝之今翻在後蓋以勸激長史之辭也

右南嶽夫人言

張姜子西州人張濟妹也

濟後漢末西涼州人為董卓將後攻

穰城被射死即張繡從叔也其妹不顯外書不知出適末

李惠姑齊人夏

侯玄婦也

玄魏末人與李豐俱為晉文王所誅不知婦亡在玄之前後李豐乃

是馮翊人非齊人不

施淑女山陽人施績女

也

施績吳興人孫皓時為驃騎將軍守西陵今云山陽恐女或出適取夫家郡不爾則

乖鄭天生鄧芝母也

鄧芝字伯苗南陽新野人在蜀為劉禪車騎將

軍後行見媛抱子行引弓射殺因感念而亡母不知鄭誰之女

此數女子昔

世有仁行令問並得在洞中洞中有易遷館

舍真臺皆宮名也計今在易遷館東廂中此

館中都有八十三人又有協辰夫人者九宮

之女也太上往遣來教此等法皆以保命授

書協辰夫人主教領之也夫人漢司空黃瓊

女黃景華也韓終授其岷山丹服得仙

黃瓊江夏

人字世英漢順帝時司空司徒太尉年七十

九亡父名香章和帝時為尚書令救活千餘人瓊子琬司徒太尉為李權所殺夫人亦不

知出適末今此諸人或稱女或稱婦或稱母蓋各取名達者而言之非

舍真臺是女人已

得道者隸太元東宮中近有二百人

前云八十三人

正言 卷之十三 六
止是易遷耳含真既為貴此二宮盡女子之
勝當須遷轉乃得進入也

宮也又有童初蕭閑堂二宮以處男子之學

也其男女名氏又出後計與數人共止最於

鄧伯苗母相親愛餘亦厚耳伯苗母即鄭夫人也設牀

待靈誠孝子之長想也計亦已為其兒作惠

益也計前與爾杯布殆相與為贈當往洞室

之際耳仙官有禁不得道實故假以他惠也

此亦意之至也其亦欲設牀寢令精氣之往

有所棲者也可密諸其兒道如此此今告掾也其事皆

有指趣不
容顯注之

從定錄官寮來凡三十一條並有掾寫

注之一卷相隨

真誥卷之十二

真誥卷之十三

梁華陽隱居陶弘景撰
明震維居士俞安期校

稽神樞第三

地下主者復有三等鬼帥之號復有三等並
是世有功德積行所鍾或身求長生步道所
及或子弟善行庸播祖禰或諷明洞玄化流

昆祖

洞玄即大洞玄經讀之萬遍七祖已下
並得鍊質南宮受化胎仙非今世所稱

洞玄靈寶經也

夫求之者非一而獲之者多途矣要

真誥

卷之十三

一

由世積陰行然後皆此廣生矣鬼帥武解主

者文解俱仙之始也度名東華簡刊上帝不

隸艷宮不受制三官之府也又別云心勤於事欲兼味於清

正華目以隨世畏死而希其一等地下主者

散在外舍閑停無業不受九宮教制不聞練

化之業雖俱在洞天而是主者之下者此自

按四明法一百四十年依格得一進耳一進

始得步仙階給仙人之使令也依劔經主者大有品秩遷

轉年限賒促懸殊此等數之目異其二等地於品名反以多為貴如此階秩矣

下主者便徑得行仙階級仙人百四十年進

補管禁位管禁之位如世間散吏者也此格

即地下主者之中條也李東等今在第一等

中李東曲阿人乃領戶為祭酒今猶有其章本亦承用鮑南海法東才乃凡劣而心行

清直故得為最下主者使是許家常所使未

昌元年先生年二十三就其受六甲陰陽行

厨符既相關悉其第三等地下主者之高者

便得出入仙人之堂寢遊行神州之鄉出館

易遷童初二府入晏東華上臺受學化形濯

景易氣十二年氣攝神魂十五年神束藏魄

三十年棺中骨還附神氣四十年平復如生人還遊人間五十年位補仙官六十年得遊廣寒百年得入昆盈之宮此即主者之上者仙人之從容矣

張姜子等先在第二等中亦始得入易遷耳

鬼帥之位次亦如此矣主者之位亦不限男女按此年限得棺中

之骨便得出生世中亦往往有此改變易遷隱適難已意量殆入不可思議之境耳

童初二宮是男女之堂館也其中間靜東海

青童君一年再遊校此諸宮觀見羣輩也一年

再遊似依傳中曰而前書云正月二十三趙日東宮上人來便是不必復有定期也

素臺在易遷宮中已四百年不肯徙自謂天

下無復樂於此處也趙素臺是趙熙女漢時

為幽州刺史有濟窮人於河中救王惠等於

族誅行陰德數十事故其身得詣朱陵兒子

今並得在洞天中也熙恒出入在定錄府素

臺數微服遊行道巷盼山澤以自足矣趙熙漢書

不顯微服遊行蓋謂在洞天中耳不應乃出世中也易遷中有高業而

蕭條者有竇瓊英韓太華劉春龍王進賢李

奚子郭叔香此數人並天姿鬱秀澄上眇邈才及擬勝儀觀駭衆此則主者之高者仙官之可才其次及得張善子輩鄧伯苗母有善行故後來人多宗芑之竇瓊英者竇武妹也其七世祖有名峙者以藏枯骨爲業以活死爲事故祚及於英身矣竇武字游平竇融玄孫峙則應是融祖也武亦恒以財物散施天下貧乏靈帝時爲大將軍與陳蕃俱被誅其母產武時并產一蛇蛇出卽走上南山至母死無何而來哀泣良久又去亦所以爲異但未解俱承七世之慶兄戮而非道家之北斗也鬼官別有北斗君妹當仙

以司生殺爾

按孫皓敗將張悌軍人柳榮病死已三日且忽起大呼云至北

斗門下見人縛悌來因是驚誤爾日晚悌戰死如此卽應是第四宮也今第五第六宮不顯所主者恐是考責之府也

鬼官之太帝者北帝君也治第一天宮中總

主諸六天宮餘四天宮其四明公各在其中

治

雖云各治一宮又不顯各在何宮宮既並列復不得依位作四方言之尋其公次第

高下則第二宮名爲西明公治第三宮東明公治第四宮北斗君治及次南次北也

二天宮立一官六天凡立爲三官三官如今

刑名之職主諸考謫常以真仙司命兼以總

御之也並統仙府共司生死之任也大斷制

皆由仙官

道家呼三官者是此也而消魔經云岱宗又有左火官右水官及

女官亦名三官並主考罰今三茅君通掌之大君為都統保命為司察矣所以隸仙官者以為為天下人不盡皆死其中應得真仙則非北帝所詮或有雖死而神化反質者如此皆在真仙家簡錄故司鬼官北斗君乃是道家命之職應而統之也

七辰北斗之考官此鬼一官又隸九星之精

上屬北晨玉君府耳

天上北斗有所司察故鬼官亦置此職以精象

相應統領既關璇璣是

未必盡徑來也別更

一二密可示爾同氣令知斗處幽閒之泰也

道業可不勗哉

此三人外書並不顯後漢有李雲亦為白馬令以直言忤

旨死令示同氣者

七月二十四日夜保命君

告

按前受長史司馬諸人雖定錄所告而應是初說洞中事是丑年十一月今此說雜

人乃宜繼後反為七月復不應是寅年進退拯難詳從地下主者來凡十四條並有掾寫

共一卷也

含真臺洞天中皆有非獨此也此一臺

偏屬太元府隸司命耳其中有女真二人總

之其一女真是張微子漢昭帝時將作大匠

張慶女也微子好道因得尸解法而來入此

亦先在易遷中微子常服霧氣自云霧氣是

山澤水火之華精金石之盈氣也久服之則能散形入空與雲氣合體微子自言受此法於東海東華玉妃淳文期文期青童之妹也微子曾精思於寢靜誠心感靈故文期降之授以服霧之道也服霧之道授微子微子亦時以教諸學在含真易遷中者我昔嘗得此方乃佳可施用者也

服霧法常以平旦於寢靜之中坐卧任已先閉目內視髣髴如見五臟畢因口呼出氣二

十四過臨目爲之使目見五色之氣相繞纏在面上鬱然因又口內此五色氣五十過畢咽唾六十過畢乃微呪曰太霞發暉靈霧四遷結氣宛屈五色洞天神烟合啓金石華真藹鬱紫空鍊形保全出景藏幽五靈化分合明扇虛時乘六雲和攝我身上昇九天畢又叩齒七通咽液七過乃開目事訖此道神妙又神州玄都多有得此術者爾可行此法邪久行之常乘雲霧而遊

此服霧法已別抄用事在第三篇中今猶

疑存此與本文相隨也

其一女真是傅禮和禮和是漢

桓帝外甥侍中傅建女也北地人其家奉佛精進女常旦夕灑掃佛前勤勤祝誓心願仙化神靈監其此心亦得來此久處易遷今始得為含真臺主也常服五星氣以得道禮和善歌歌則鳥獸飛聚而聽聲焉

右定錄君言

張傳二人外書不顯或應各在家譜中

右一條有楊書又掾寫

王衍為晉武帝尚書令其女字進賢為愍懷

太子妃洛陽亂劉曜石勒畧進賢渡孟津河於河中欲妻之進賢罵曰我皇太子婦司徒公之女而胡羌小子敢欲干我乎言畢即投河中其侍婢名六出復言曰大既有之小亦宜然復投河中時遇嵩高女真韓西華出遊而愍之撫接二人遂獲內救外示死形體實密濟便將入嵩高山今在華陽宮洞內易遷之中六出時年二十二三許體貌亦整善有心節本姓田漁陽人魏故浚儀令田諷之孫

諷曾有陰德之行以及於六出耳

晉書云王衍長女名

景風貌美賈后為弟謚娶之少女名惠風以配愍懷太子恨之如此則不甚美也未嘉五年六月王彌劉曜石勒破洛賊欲逼妃妃拔刀曰我太尉公之女皇太子之妃有死而已終不為逆虜所辱遂見害家人收葬於城西南洛水之北追謚曰貞定妃與此說小異

范幼冲遼西人也受胎化易形今來在此恒服三氣三氣之法存青氣白氣赤氣各如綆從東方日下來直入口中挹之九十過自飽便止為之十年身中自有三色之氣遂得神仙此高元君太素內景法旦旦為之臨目施

行視日亦佳其法雖鮮其事甚驗許侯可為

之此法亦以重抄書在第三篇修有事中范監者即其人也昔

得為童初監今在華陽中又別云曾為漢尚書郎善解地理以

冢宅為意此亦在第三篇右三條並楊書河內李整昔受守一法

并洞房得道初在洛陽山近來入華陽中又

主諸考崇民間之事整往為常道鄉公傳受

道入山時已年六十不知李作何位亦應是監職常道鄉公魏元帝

本封也罍山東北有穴通大句曲南之方山之

南穴姜伯真數在此山上取石腦石腦在方

山北穴下繁陽子昔亦取服

此罡山猶是大橫山故後云掾

恒與方山五人往來但不知有路通洞

此北

天中不爾繁陽子即鹿迹

洞中何苗也

此北

崿山中亦有此物未詳崿山在何處今句曲北鹿迹山西有名崿角山

似當是其處也石腦故如石但小斑色而輒耳所在

有之服此時時使人發熱又使人不渴李整

昔未入山時得風痺疾久久乃愈耳此人先

石腦今大茅東

多房內事殆不同今者疾之輕薄也

亦有形狀圓小如曾青而質色似鍾乳牀下乃皎白時有黑斑而虛輒服之乃熱為治亦似鍾乳也

羅江大霍有洞臺中有五色隱芝

此則南真

及司命所任之處也

華陽洞亦有五種夜光芝

此則司命所請

以植句曲內外者也

良常山有熒火芝此物在地如熒

火狀其實似草而非也大如豆形紫華夜視

有光得食一枚心中一孔明食七枚七孔明

可夜書計得食四十七枚壽萬年

從來未聞有見之者

當是無至心尋求耳

包山中有白芝又有隱泉之水正

紫色

此即林屋山也

華陽雷平山有田公泉

水飲之除腹中三蟲與隱泉水同味云是玉

砂之流津也用以浪衣不用灰以此為異矣

此水今從地涌出狀如沸水味異美取洎垢衣便自得淨即所呼為柳谷汧者在長史宅東南一里許也昔高辛時有仙人展上公者於伏龍

地植李彌滿其地展先生今為九宮內右司

保其常向人說昔在華陽下食白李味異美

憶之未久而忽已三千年矣諸曆檢課謂堯元年戊戌至齊

之巳卯歲二千八百三年高辛即堯父說此語時又應在晉世而已云三千年即是堯至今不啻二千八百餘年外曆容或不定如此丁亥之數不將已過乎及冢紀年正二千六百

四十二年彌復大懸也後有郭四朝又於其處種五果

又此地可種柰所謂福鄉之柰以除災厲秦

時有道士周太賓及巴陵侯姜叔茂者來往

句曲山下又種五果并五辛菜叔茂以秦孝

王時封侯今名此地為姜巴者是矣以其因

叔茂而名地焉地號今亦存有大路從小茅後通延陵即呼為姜巴路也

但秦孝公時未并楚置郡巴陵縣始晉初此不知那有巴陵之封恐是巴蜀之巴故也此

二人並已得仙今在蓬萊為左卿今南鄭諸

姜則叔茂之後茂曾作書與太極官僚云昔

學道於鬼谷道成於少室養翮於華陽待舉

於逸域時乘颿輪宴我句曲悟言未歎代謝

之速物存人亡我勞如何太賓亦有才藝善

鼓琴昔教糜長生孫廣田廣田即孫登也獨

絃能彈而成八音真奇事也孫登即嵇康所謂長嘯者亦云

見彈一絃之琴斯言非虛矣叔茂種五辛菜常賣以市丹

砂而用之今山間猶有韭薤即其遺種邪呼今

為韭山在大茅西甚多大韭又餘處亦有蒜薤耳非山姜巴一處也今舍前有

塘乃郭四朝所造也高其牆岸蓋水得深但

歷代久遠塘牆頽下耳今舍語似是論長史宅宅前今乃有塘近

西為堤牆即是過柳汧水而去郭于甚遠郭千在北洞西北今有大陂塘四朝先應住此

未解舍前之意恐長史於波復立田業又有說在後四朝常乘小船游

戲其中每叩船而歌曰清池帶靈岫長林鬱

青蔥玄鳥藏幽野悟言出從容鼓檝乘神波

稽首希晨風未獲解脫期逍遙丘林中晨風謂上

清玉晨之風非毛詩所謂鷓鴣彼晨風之鳥也浪神九垓外研道遂

金真戢此靈鳳羽藏我華龍鱗高舉方寸物

萬吹皆垢塵顧哀朝生惠孰盡汝車輪女寵不弊

席男愛不盡輪朝生蜉蝣也遊空落飛颿靈

步無形方圓景煥明霞九鳳唱朝陽暉翮扇

天津菴藹慶雲翔遂造太微宇挹此金黎漿

逍遙玄垓表不存亦不亡玄垓九垓皆八極之外九震之頂名

也飛登木星亦名玄朗東陽之垓故若士駕語盧敖云吾與汗漫期於九垓之上矣

歛舞神霄披霞帶九日高皇齊龍輪遂造北

華室神虎洞瓊林風雲合成一開闔幽冥戶

靈變玄迹滅四朝為玉臺執蓋郎故云高皇齊龍輪定錄言

右十二條掾寫共一篇

四朝燕國人也兄弟四人並得道四朝是長

兄也真法其司三官者六百年無違坐超遷

之四朝職滿上補九宮左仙公領玉臺執蓋

郎中間又闕無人後以思和代四朝也山下

居民今猶呼一平澤地為郭千者是四朝之

姓尚存於民口也四朝往曾使人種植於此

地也年年四朝每行皆過詣此山以造思和

遊看原阜此是茅傳中言也按如此說郭千止是種植處非居止也住處則長

史宅果應是矣今塘牆既頽決水不復甚停人皆以為田耳然其地汗濶小壅猶自城池

可得汎舟而歌但無人能追蹤遠世可歎如何後云此四朝年年行過遊看是上補去後

猶復憶羨舊居所以張玄賓者定襄人也魏

數宴良常眷盼朋好

武帝時曾舉茂才歸鄉里事師西河蘄公服
术餌兼行洞房白元之事後遇真人樊子明
於少室授以遯變隱景之道昔在天柱山中
今來華陽內爲理禁伯理禁伯主諸水雨官
也此人善能論空無乃談士常執本無理云
無者大有之宅小有所以生焉積小有以養
小無見大有以本大無有有亦無無焉無無
亦有有焉所以我目都不見物物亦不見無
寄有以成無寄無以得無於是無則無宅也

太空亦宅無矣我未生時天下皆無無也其
所論端據如此桐柏諸靈亦不能折也自云
昔曾詣蓬萊宋晨生晨生者蓬萊左公也與
其論無粗得人意過此已去尚未能本有安
能本無邪與餘人論空無天下中皆無人焉
其高氣秉理如此東卿君紫微玄清亦莫得
而干也理禁伯官亦保命之監國也

此論空無之理

乃殊得無宗而玄玄固難可曲覈矣真人之
才義亦是甚有優劣東卿桐柏紫微玄清蓋
相推並言談之英辯者故舉此爲標也按左
傳稱君之世子從曰撫軍守曰監國監國之

任則是副貳疑此監國或因作監司也

趙威伯者東郡人也少

學邯鄲張先生先生得道之人耳晚在中嶽

授玉佩金鐺經於范丘林丘林乃是漢樓船

將軍衛行道婦也學道得仙遂授行挹日月

之道又服九靈明鏡華遂得仙昔亦來在華

陽內為保命丞河圖云吳楚得有得見太平

者其常語人云此語不虛此驗不及

如此諸學者何

可不彌加勤勵也

其存明鏡非世間常法也受范丘

林口訣云善嘯嘯如百鳥雜鳴或如風激衆

林或如伐鼓之音時在天市壇上奮然北向

長嘯呼風須臾雲翔其上衝氣動林或冥霧

飆合或零雨其濛矣保命有四丞此一人主

為暴雨水及領五芝金玉草若欲致洪雨者

將可辭詣之也

又理禁伯亦主雨水若請雨宜併為辭也

其一丞

是咸陽樂長治東卿司命君鄉里人也為小

君所舉用漢桓帝中書郎晚從中嶽李先生

受道行七元法得仙

相去二百餘年猶蒙卿邽之澤也

一人

是孟君入室弟子鄭雉正者孟君所屬用

孟君

京兆人或呼為孟其一人是西山唐房此則神仙

傳所載是蜀人奉事李八百者也樂長治主災害鄭雉正主

考注唐公房主生死趙威伯主仙籍并記學

道者并暴雨水靈芝草洞宮官寮司察吳越非民在任不過此四

丞也其下則有四師事在第三篇中

定錄道此

右此有掾寫依紙墨亦言前篇而中間

有此失缺此行後又割恐別復有事並

遺落深可恨惜耳

杜契者字廣平京兆杜陵人建安之初來渡

江東依孫策入會稽嘗從之後為孫權作立

信校尉黃武二年漸學道遇介琰先生授之

以玄白術隱居大茅山之東面也守玄白者

能隱形亦數見身出此市里契與徐宗度晏

賢生合三人俱在茅山之中時得入洞耳或

自採伐貨易衣糧於虛曲而人自不知之耳

猶琰者即白羊公弟子也今在建安方山中

也琰即禁山符云為孫權所殺化形而去往建安方山尋白羊公杜必當於此時受道

也契音薛卽與舜同契字徐宗度晉陵人作
 四畫契二三畫分毫有異也
 孫皓左典軍呂悌司馬受風谷先生氣禁道
 故得契俱晏賢生是步陟外甥卽宗度之弟
 子也

契弟子二人一人孫賁孫女寒華也少時密
 與契通情後學道受介琰法又以法受寒華
 寒華初去時先叛入建安依邵武長張毅毅
 卽契通親故得免脫事平乃歸茅山耳寒華
 行玄白法而有少容今嘗俱處也玄白道忌

房室自契受道不得行此

吳豫章太守孫賁之子也山陰王孫

奚之子寒華也尋此二人乃因奔淫無應入
 道而用志能自抑斷如此此宜其階也賁是
 權同堂兄有子四人各名鄰安熙疏而
 無奚或是小名又無奚或爲王者也 其弟

一子是陳世京世京孫休時侍郎少好道數
 入佛寺中與契鄉里故晚又授法契初將寒
 華入建安之時時亦同舉實賴世京濟其密
 計焉此數子今處茅山之外非常在洞中之
 客也亦時得入耳亦數至長史舍屋間遊戲
 然多在大茅之間

建安初至孫休卽位六十
 二年杜初從孫策不減年

二十左右則逃時已年八十許矣不容此爾世京今服木澤瀉寒

華無所服茅山通無石室則必應起廬舍既

容都為隱默但于時林守玄白之道常旦旦

坐卧任意存泥丸中有黑氣存心中有白氣

臍中有黃氣三氣俱仙如雲以覆身上因變

成火火又繞身身通洞徹內外如此旦行之

至日向中乃止於是服氣百二十過都畢道

止如此使人長生不死辟却萬害所謂知白

守黑求死不得知黑守白萬邪消却尤食六

畜肉及五辛之菜當別寢靜思尤忌房室房
室即死

此道與守一相似但如為徑要以減之耳忌
房室甚於守一守一之忌在於節之耳初存

氣出如小豆漸大衝天三氣纏煙繞身共同
成一混沌忽生火在三煙之內又合景以鍊

一身一身之裏五臟照徹此亦要道也此數
人並已三百餘年正玄白之力也並是不死

之學者未及於仙道玄白事已重抄出在第三篇修用中計杜於建

安初可年二十許至晉興寧三年始一百九十歲諸人又晚學而此云並三百餘年恐長三字亦強若欲守玄白者當與其經經亦少

許耳自可兼行以除萬邪却千害行之三十年匿身隱形日行五百里

一名此道為胎精中景玄白法也

八月十四日夜保命仙君告

此告必應是告牙亦可試以

戲長史爾牙守一竟未起別寢邪

此一誥是論玄白守一事忽然

憶寅獸寅獸當是未免房中因而及此也淳景翳廣林曖曖東霞

升晨風舞六煙敦鬱八道騰五嶽何必秀名山亦足凌矯手攝洞阜棲心潛中興吐納胎

精炁玄白誰能勝右杜廣平恒喜歌吟此今疏相示

右定錄君道此

此亦應同十四夜告

從杜來九條並有掾寫共一篇

峩峩岑山幽巖嶺芳卓卓先生乘和來翔散髮頽頽躬耕陵堙三餐自足不期裏糧玉迹東映鳳響西彰公侯招之凌風振裳處不矜

嘿出不希揚被褐容與杖策頡頏

此一篇有異手書乃

接前詩後而後又仍接以蕭寂華門事既真書止說前一篇已自右畢則此詩非復是杜

所作而不知近所標靜舍地此金鄉之至室其義是誰

若非許長史父子豈得居之後世當有赤子

賢者乃得居此鄉爾子孫事祕之不可輕泄

按此所標即應是後云長史所營屋宅處也金陵之地乃廣則此為最勝之地非真仙不

得居故唯長史掾可居耳赤子賢者莫測為誰或是姓赤或是大人或將來英賢應運者

乃當復得居之既方是後世子孫時事則非今所宜預言兼以此地福重不欲宣廣使人

濫住致有許長史今所營屋宅對東面有小犯穢故也

山名雷平山周時有雷氏養龍來在此山後

有姜叔茂田翁亦居焉其山北有柳汧水或

名曰田公泉以其人曾居此山取此水故也

雷平山在小茅北基址相連田公泉今具存左右甚多水柳樹故名柳汧此泉即前所云

浣衣不用灰者長史宅自湮毀之後無人的知處至宋初長沙景王檀太妃供養道士姓

陳為立道士解於雷平西北即是今北解也後又有句容山其王文清後為此解主見傳

記知許昔於此立宅因博訪耆宿至大明七年有術虛老公徐偶云其先祖伏事許長史

相傳識此宅只在今解前烏柏樹處應是似猶有齋堂前井存于時草萊蕪沒王即芟除

尋覓果得磚井上已欲滿仍掘治更加甃累今有好水水色小白或是所云似鳳門外水

味也於是審知是故宅從來空廢無敢居者既云金鄉至室便為伏龍之膏腴矣其西北

即有長岡連亘雷平山之東北有山俗人呼呼為長隱者也

真言 卷之十三
為大橫山其實名鬱岡山也名山記云所謂
岡山者也下有泉水昔李明於此下合神丹
而升玄洲水邊今猶有處所此山正東面有
古時越翳王冢本墓字後人瞻作冢此山今
連延甚長後云古人合丹猶
應是此李明但言在方隅則疑其小近南水
邊不復見有基迹或漸蕪沒故也越翳王是
句踐四世孫初不肯立逃入菁山穴越人薰
出之後於吳徙還會稽以周宣王十一年為
孫諸咎所殺越人又殺諸咎不知那得遠來
葬此或當有神異處故也今尋視未見指的
墳冢而如有
兆域處者

右定錄君言

右三條有掾寫

華陽中玉碣文在童初府西向一云四面其
文曰解帶被褐尋生理活養存三亦洞我玉
文領理八老二十四真不眠內視微氣綿綿
把錄太素玄之又玄神道在今子來乃臻

易遷云鄧夫人語之解此則得仙此仙之要
言易遷不解此許侯可解注之易遷則長史
妻也鄧夫人

即鄧芝母也此碣文乃粗可領解皆上道中
事但下挺者無由究知之故令長史解釋亦
或試以
戲之耳

右一條有其書

隱居今所安經昭靈臺前欲立小石碣子刻書華陽頌十五篇皆讚述此山洞內外事庶以標誠靈府永垂遠世而未辦作石今且載其文於此曰

河篇徵往冊孔記昭昔名三宿麗天序兩金標地英 右樞域

宅無乃生有在有則還空靈構不待匠虛形自成功 右質象

總神列三府分途交五便陰暉迎夜哲晨精望曉懸 右形位

南峯秀玄鼎北嶺橫秦壁表裏玉沙津周回隱輪迹 右標貫

左帶柳汧水右浚陽谷川土懷北邙色并冽鳳門泉 右區別

郭干峙流岸姜巴亘遠蹤廟貌或時饗別宅乃恒恭 右迹號

吳居非知地越家詎隱遷樹蓋徒低蔭石竈

未嘗煙 右類附

果林鬱餘柎蔬圃蔓遺辛熒芝可燭夜田泉
常澣塵 右物軌

降轡龜山客解駕青華童寢宴含真館高會
蕭閑宮 右遊集

清歌翔羽集長嘯歸雲翻子絃有逸調空談
無與論 右才英

標舍雷平下立靜連石陰上道已沖念飛華
當軫心 右學稟

方嶠遊瓊刃華陽棲隱居重離儻或似七元
乃扶胥 右挺契

號期行當滿亥數未終丁迨乃承唐世將賓
來聖庭 右機萌

濟神既有在去留從所宜靈迹何顯晦冥途
自相知 右業運

刊石玄窻上顯誠曲階門動靜顧矜錄不負
保舉恩 右誠期

右此十五首下各兩字是其一 篇中意篇

真誥卷之十三
中字字皆有義旨後之人自以篇中事求之

真誥卷之十三終

真誥卷之十四

梁華陽隱居陶弘景撰
明震維居士俞安期校

稽神樞第四

大茅山之西南有四平山俗中所謂方山者也其下有洞室名曰方臺洞有兩口見於山外也與華陽通號爲別宇幽館矣得道者處

焉

此山去大茅山可二十許里西南六七里有此一洞口見外近時有人入見一青蛇在洞中因與呼爲青龍洞山近上及北面西面亦並有洞穴同不知何者是此兩口耳山上

又有泉水冬夏不竭山平所以號為四平及方山也甚多南燭今積金山

東大館中諸道士所資為藥也其中先止者

有張祖常劉平阿呂子華蔡天生龍伯高並處于方臺矣

張祖常者彭城人也吳時從北來得入此室

祖常託形墮車而死故隱身幽館而修守一

之業師事上黨鮑察者漢司徒鮑宣五世孫

也察受道於王君鮑宣漢司隸校尉為王莽所害宣子永永子昱昱子

某

劉平阿者無名姓名姓不示人也漢末為九

江平阿長故以為號行醫術有功德救人疾

病如已之病行遇仙人周正時授以隱存之

道託形履帽而來居此室常服日月晨炁顏

色如玉似年三十許人二君何容不知其本名既示不欲復說之

耳戴孟之本族乃亦已陳之在後矣

呂子華者山陽人也陰君弟子已服虹丹之

液而未讀內經來從東卿受太霄隱書而誦

之常以幽隱方臺為樂不願造于仙位也

真誥 卷之十四
蔡天生者上谷人也小爲嘯父賣雜香於野
外以自業瞻情性仁篤口不言惡道逢河伯
少女從天生市香天生知是異人再拜上一
檐香少女感之乃教其朝天帝玉皇之法遂
以獲仙託形舄杖隱存方臺少女今猶往來
之也天生師之

龍伯高者後漢時人漢伏波將軍馬援戒其
兄子稱此人之佳可法卽其人也伯高後從
仙人才道林受服胎炁之法又常服青飢方

託形醉亾隱處方臺師定錄君也

伯高名述京兆人漢

建武中爲山都長擢至零陵太守馬援征南
日遺兄子嚴書曰龍伯高敦厚周慎口無擇
言謙約節儉廉公有威吾愛之重之願汝曹
効之効伯高不得猶爲謹勅之士謂刻鵠不
成尚類鷺者也

雷平山之東北良常山之東南其間有燕口
山三小山相隅故也一名曰方隅山下古人
曾合九鼎丹於此間也幽人在此時心樂居
焉今常遊此方隅山下亦有洞室名曰方源
館亦有二口常見外也常有此五人爲旅山

即是大橫西南別有二墩壠相聚今人不復
有乎其名者前云李明合丹即是此矣幽人
者椽去世後不欲顯名故號為幽人此是未
受事且停洞館修業也山今亦有兩小口五
人為旅即向之四平山者既去來相通故時
共遊處也所以楊君夢椽云向從四平山來
也右六條是手新寫
應是保命君所告也

鹿迹山中有絕洞絕洞者纔有一二畝空地
無所通達故為絕洞洞室四面皆有青白石
亦以自然光明如絲舊作繖字如此張形下正平自
有石牀石榻曲夾長短障隔分別有如刻成
亦整盛也東北有小口纔劣容人入入二三

百步乃得洞室初入口甚急愈入愈寬大也
口外南面有三積石積石下有沂索即可得
也亦或以一小石掩穴口穴口大小俱如華
陽三便門便門亦用小石塞其口自非清齋
久潔索不可得鹿跡洞子亦爾不受穢氣故
也此山今屬南徐州界正對茅山北望見之
亦有道士住鹿跡在石上故仍以為名洞
口處乃可知而甚嚴繁亦无人敢觸冒者此
云如華陽三便門則南洞北洞本天開餘東
西及東南鹿跡華山中及洞主有謝稚堅王
皆是塞矣伯遼繁陽子號名耳是漢越騎校尉何苗叔

達也進之同母弟少好道曾居河東繁山之

南服食故自號為繁陽子中君答長史問葛玄云在蓋竹山恒

與謝稚堅相隨今稚堅乃在此不知為去來

往還為當兩人同姓名也後漢書云何苗是

何進異母弟為車騎將軍黨附閹勢進被害

時苗於朱雀闕下與進將吳匡戰死被斬董

卓又破棺出尸支解之既非故為兵解去不

知那遂得來居此其母亦被刑苗既非進同

生宮位復異具苗而字達於義不類又有馮

恐別是一弟不必是名苗戰死者耳

良馮良南陽冠軍軍人少作縣吏年三十為

尉從佐迎督郵自耻無志因毀車煞牛裂敗

衣幘遂去從師受詩傳禮易復學道術占候

家中謂已死十五年乃還整修志節抗操嚴

恪州郡禮辟不就詔特徵賢良高第半道委

之還家時三公爭讓位於良遂不降就年六

十七乃棄世東渡入山今在鹿跡洞中後漢安帝

時人也漢書所載事亦畧同又有郎宗者字仲綏北海安

丘人少仕宦為吳縣令學精道術占候風烝

後一旦有暴風經窻間占知京師大火燒大

夏門遣人往參果爾諸公聞之以博士徵宗

宗耻以占事就夜解印綬負笈遯去居華山

真告 卷之二十四 四 五

下服胡麻丸得道今在洞中

後漢書載郎宗事云理京房易

善心算風角六日七分能望氣占候吉凶常

賣卜自奉安帝徵對策為諸儒表候拜吳令

時卒有暴風宗占知其言諸公聞而表上以博

月遣人參候果如其言諸公聞而表上以博

士徵之宗耻以占驗見知徵書到夜懸印綬

於縣庭而遜去遂終身不仕子覲字稚元傳

父業研精學徒常數伯人順帝陽嘉二年徵

詣闕上書十一事拜郎中還家後為同縣孫

禮所其餘其王叔明鮑元治尹蓋婦之徒復

二十餘人並在北山不能復一二記之也此

數人是絕洞諸山之主耳此絕洞仙人亦思

得學道者欲與之共處於洞室困時无其人

耳此洞既无所通達正是地仙道喪由簪良

可哀矣寓家辱人哉簪者謂人貪仕宦衣冠

寄寓耳此洞中乃是永宅為戀戀不去

實足辱敗人矣此亦諷誘於長史耳

右保命君告

右三條楊書

范帥云三官有獄官不名廷尉名大理李豐

今為大理都餘一守缺以擬王附子不以與

許虎也守職如今獄之三官也

李豐字安國改字宣國馮翊人李義子本寒微有才志遂事魏為尚書僕射尉與夏候玄謀廢晉景王事泄召來令

人以刀鏢撞腰煞之大理當為大理即古之
獄官前漢洎魏時廷尉亦名大理此職是仙
官也王附子是王公之
小名許虎即虎牙也

鮑靚因吾屬長史鼠子輩既爾可語郡守令

得反映亦屬吾其家比衰欲非可柰何可寫

存之耶

鼠子恐是鮑靚小名鮑為南海郡仍
解化兒輩未得歸都所以屬之鮑即

許先生
之師也

右二條有楊書

武當山道十戴孟者乃姓燕名濟字仲微漢
明帝末時人也夫為養生者皆隱其名字藏

其所生之時故易姓為戴託官於武帝耳而

此人少好道德不仕於世矣少孤養母母喪

行服葬服闋遂入華陽山服木食大黃及黃

精種雲母雄黃丹砂芝草受法於清靈真人

即裴冀州之弟子也得不死之道裴真人授

其玉珮金鏞經并石精金光符遂能輕身健

行周旋名山日行七百里多所經涉猶未得

成仙人也

戴乃授行玉珮金鏞而止不死而
已未得神仙於理為小難詳後又

云玄真亦其鈔要行之者神仙不死又與本
經不同及石精金光符既不為劍用則止是

真言 卷之四
解化一符單服者此符主隱遜不
云健行也種五品芝世亦有法

仙人郭子華張季連趙叔達晚又有山世遠

者此諸人往來與之遊焉昔居武當今來大

霍欲從司命君受書故未許焉山已得為太
和真人則應

居在南陽太和山矣餘
三人不見別顯出也

戴公拍腹有十數卷書是太微黃書耳此人

即謝允之師也按金相傳太微黃書第八篇
有目錄云凡有八卷唯此一

卷出世今戴公乃有十許篇亦為不同拍腹
之義謂恒以繫腰也其外傳事亦同此謝允

字道通歷陽人小時為人所畧賣往東陽後
告官被誣在烏傷獄事將欲入死夜有老公

授其符又有黃衣童子去來於是得免咸康
中至襄陽入武當山見戴孟孟即先來獄中

者因是受道又出仕作歷陽新豐西道三縣
所在多神驗年七十餘猶不老後乃告終也

黃衣童子者即玉珮金鐺之官耳云坐上常

有一人共坐臚者應是臚臚
不明狀也即太極真人時

往來也按說如此似答問黃衣童子意亦可
是午時既及謝因此面訪其事

受行玉珮金鐺經自然致太極真人諺云服

九靈日月華得降我太極之家此之謂也玄

真之法亦其鈔要也行之者神仙不死

裴真人有弟子三十四人其十八人學佛道

真告 卷之四

真誥 卷之十四
餘者學仙道

應作牖字弟子劉顯林辛仲甫趙子常

周真人有十五人弟子四人解佛法

入室弟子王瑋

達李建道泉法堅

桐栢有二十五人弟子八人學佛

入室弟子于弘智竺

法靈鄭文成陳元子此當畧舉標勝者耳辛泉于竺皆似胡姓也當是學佛弟子也

右八條有掾寫共一篇相連

霍山中有學道者鄧伯元王玄甫受服青精石飯吞日丹景之法用思洞房已來積三十四年乃內見五藏冥中夜書以今年正月五

日太常遣羽車見迎伯元玄甫以其日遂乘

雲駕龍白日登天今在北玄圃臺受書位為

中嶽真人

伯元吳人玄甫沛人

華陰山中有學道者尹虔子張石生李方回

並晉武帝時人授仙人管成子蒸丹餌木法

俱服得延年健行又受蘇門周壽陵服丹霞

之道行已五十年精心內視不復飲食體骨

輕健色如童子以今年二月十二日太一遣

迎以其日乘雲升天今在玄州受書為高仙

真人張石生爲東源伯

衡山中有學道者張禮正冷明期二人禮正以漢末在山中服黃精顏色丁壯常如年四十時明期以魏末入山服澤瀉栢實丸乃共同止巖中後俱授西城王君虹景丹方從來服此丹已四十三年中患丹砂之難得俱出廣州爲沙門是滕舍爲刺史時也遂得內外洞徹眼明身輕一日行五百里又兼守一守一亦已三十年以三月一日東華遣迎以其

日乘雲升天今在方諸飈室俱爲上仙

滕舍以永

和十年甲寅年爲廣州刺史此得仙乙丑歲十二年是爲前服丹已三十二年猶更出查也

廬江潛山中有學道者鄭景世張重華並以晉初受仙人孟德然口訣以入山行守五藏含日法兼服胡麻又服玄丹久久不復飲食而身體輕強反易故形以今年四月十九日北玄老太一迎以雲輶白日升天今在玄州括蒼山有學道者平仲節河中人以大胡亂

中國時來渡江入括蒼山受師宋君存心鏡
之道具百神行洞房事如此積四十五年中
精思身形更少體有真炁今年五月一日中
央黃老遣迎卽日乘雲駕龍白日升天今在
滄浪雲臺大胡亂者是劉淵劉
總時也石勒爲小胡
剡小白山中有學道者趙廣信陽城人魏末
來度江入此山受李法成服炁法又受師左
君守玄中之道內見五藏徹視法如此七八
十年周旋郡國或賣藥出入人間人莫知也

多來都下市丹砂作九華丹丹成一服太一
道君以今年六月十七日遣迎停三日與山
中同志別去遂乘雲駕龍白日登天今在東
華

海中有狼五山中有學道者虞翁生會稽人
也昔受仙人介君食日精法以吳時來隱此
山兼行雲炁迴形之道精思積久形體更少
如童子今年七月二十三日東太帝遣迎卽
日乘雲升天今在陽谷山中

狼五山在海中
對白章岸今直

呼為狼山

赤水山中學道者朱孺子吳末入山服菊花
 及木餌後遇西歸子從乞度世西歸子授以
 要言入室存泥丸法三十年遂能致雲雨於
 洞房中今年八月五日西王母遣迎即日乘
 五色雲車登天今在積石臺赤水山云在鄞縣南十里從楠谿口入三百里山正赤週迴五十里高千餘丈如此則應是臨海永嘉東北名赤巖者也許先生所住赤山一名燒山即此

名山五嶽中學道者數百萬人今年有得道
 而升天者人名如別年年月月皆有去者如
 此不可悉紀今為疏一年之得道人耳有不
 樂上升仙而長在五嶽名山者乃亦不可稱
 數或為仙官使掌名山者亦復有數千

九月二十日夜清靈疏出

清靈猶是裴清靈也此九月即

應是乙丑歲即疏其年中得道者

右八條有椽寫共一卷相隨

吳睦者長安人也少為縣吏掌局枉尅民人
 民人訟之法應入死睦登委叛遠遁山林餓

經日行至石室遇見孫先生在室中隱學左
右種黍及胡麻室中恒盈食睦至乞食經月
不去孫先生知是叛人初不問之與食料理
及誦經講道說及禍福睦聞之與是心開意
悟因叩頭自搏列其事源立身所行自首事
實求得改往遂留石室爲先生掃除驅使經
四十年後先生受其道俱採藥服食胡麻精
修經教得三百二十年服丹白日升天
朱牯者陳留人也爲人無道專作劫盜後人

發覺收掩牯得逸出遠他境至汝南少室山
中見馮先生隱學云後三年乃受其真仙留
山服食修道三十八年後入東院山中壽百
四十七歲仙人降將入大有山洞中成真人
郭靜者潁川人也少孤無父母兄弟窮苦依
棲無所年十六縣召爲吏後得罪仍逃伏經
二月日不出遇見鄭先生救度一切以法勸
化之靜遂隨鄭負檐馱使經七年不敢懈怠
遂受其導引之要餌服山朮茯苓得壽三百

歲復於天維山赤松子降受其二人真道今
在大有洞中爲真人

范伯慈者桂陽人也家本事俗而忽得狂邪
因成邪勞病頓卧牀蓆經年迎師解事費用
家資漸盡病故不愈聞大道清約無所用於
是意變聞沈敬作道士精進理病多驗乃棄
俗事之得五十日病疾都愈云云後詣陸玩
之受真內道玩之不能入山伯慈不樂於世
遂辭去入天目山服食胡麻精思十七年大

洞真仙司命君下降受三十六篇經後服還

丹白日昇天今爲玄一真人

所注云云云處是抄事人不能

併取非本闕也有四條有人於東間鈔得云
是真書而不知誰跡亦無所受者而辭旨有
用故紀續之又此四人各有所明一則酷吏
二則凶劫三則孤癸四是事俗並世間薄運
遂能得道足知心之所造非關善惡者也

司馬季主後入委羽山石室大有宮中受石

精金光藏景化形法於西靈子都西靈子都

者太玄仙女也其同時今在大有室中者廣

寧鮑叔陽太原王養伯潁川劉璋惠岱郡段

季正俱受師西靈子都之道也季主臨去之際託形枕席爲代已之像墓在蜀郡成都升盤山之南諸葛武侯昔建碑銘德於季主墓前碑讚末曰玄漠太寂混合陰陽天地交泮萬品滋彰先生理著分別柔剛鬼神以觀六度顯明

真誥云季主咽虹液而頭足異處劍經注云吞刀圭而蟲流今東卿說云

託形枕席爲代已之像似當是作錄形靈丸兵解去也漢史既不顯其終无以別測其事也

廣甯鮑叔陽者漢高帝時趙王張耳張敖之

大夫也少好養生服桂屑而卒死於廁溷間

今墓在遼東薊城之北山

漢高置燕郡以薊屬燕當是未分時也

太原王養伯者漢高吕后攝政時中常侍中

瑯琊王探也少服澤瀉與留侯張良俱採藥

於終南山而養伯不反遂師事季主

前漢中常侍不

用闈人中郎非侍郎之官或是後別爲此位耳

潁川劉瑋惠漢景帝時公車司馬劉諷也後

事季主晚服日月烝爲入室弟子道成晚歸

鄉里託形杖履身死桑樹之下今墓在汝南安城縣西山

岱郡段季正本隱士也不聞有所服御晚乃

從季主學道行度秦州瀕水拘得尸而葬川

邊今南鄭秦川是也此人亦季主入室弟子

尋此四人並是用靈丸雜解之道

季主一男一女俱得道男名法育也女名法

育也女名濟華今皆在委羽山中濟華今日

正讀三十九章猶未過竟此理亦欲難詳季主讀玉

經服明丹之華挹扶晨之暉今顏色如二十

女子鬚長三尺黑如墨也昨日東卿君道此

如所疏真奇事也不知果云何耳此亦行楊君自記與

長史不知之辭或云別有以季主託形隱景潛跡委羽紫

陽傳具載其事也昨夜東卿至聊試請問季

主本末東卿見答令疏如別為以上呈願不

怪之省訖付火此楊君與長史書今有華撰周君傳記季主事殊畧未見

別真手書傳依此語則為非也是後聖李君

紀也大都與前者畧同然東卿復兼有注解

注解近萬餘言大奇作也昨來多論神化之
耳聊及季主耳去月又見授神虎經注解注
解非世間所聞亦自不掌其旨也若更聞如
季主比者自當密白此亦楊君與長史書也
既是論季主事故仍以
相次不復出置下卷長史撰真仙傳欲以季
主家在前所以楊君為請問本末也司命所
注二經並未出世也

右十條有楊書

范安遠適云湛子不事齊齊師伐之春秋傳
曰湛无禮也此則左傳上事諱字作譚字音
譚國名也莊王十三年為齊桓

所滅不知何故述
此似有所指也

莊子師長桑公子授其微言謂之莊子也隱
於抱犢山服北育火丹白日升天上補太極

闡編郎

長桑卽是扁鵲師事見魏傳及史記
世人苟知莊生如此者其書彌足可

重
矣

施存者齊人也自號婉盆子得遁變化景之
道今在中岳或少室往有壺公正此人也然
未受太上書猶未成真焉其行玉斧軍火符
是其所受之枝條也施存是孔子弟子三千

之數三千之限有此人而不預七十二者明夫子不以仙為教矣壺公即費長房之師軍軍火符世猶有文存

右三條有楊書

九疑真人韓偉遠昔受於中嶽宋德玄德玄者周宣時人服此靈飛六甲得道能一日行三千里數變形為鳥獸得玄靈之道今在嵩高偉遠久隨之乃得受法行之道成今處九疑山其女子有郭芍藥趙愛兒王魯連等並受此方法而得道者復數十人或遊玄州或

處東華方諸臺今見居也南嶽夫人言此云郭芍藥漢度遼將軍東平郭蹇女也少好道篤誠真人因授其六甲趙愛兒者幽州刺史劉虞別駕漁陽趙該姊也好道得尸解後又受此符王魯連者魏明帝城門校尉范陽王伯綱女也亦學道一旦忽委聳李子期入陸渾山中真人授此法子期者司州魏人清河王傅也其常言此婦狂走云一旦失所在此事乃出靈飛六甲經漢大將軍霍光有典衣奴

子名還車伺見二星得年六百歲今猶在焉

此事出方諸洞房經後長史抄出按魏書云青龍元年并州刺史畢軌送漢度遼將軍范明友鮮卑奴年三百五十歲言諸飲食如常人奴云霍顯者光祿小妻胡友妻是光祿前妻如依此妻便非虛矣

吞琅玕之華而方營丘墓者衍門子高丘子

洪涯先生是也衍門子墓在漁陽潞縣幽州

有潞縣上黨亦有潞縣衍門即羨門也高丘子墓在中山聞喜

縣中山有安喜縣洪涯先生墓在武威姑臧

縣涼州記作姑臧縣此三郡縣人並云上古死人之

空塚矣而不知高丘子時以尸解入六景山

後服金液之末又受服琅玕華於中山方復

託死乃入玄州受書為中嶽真人于今在也

衍門子今在蒙山大洞黃金之庭受書為中

元仙卿洪涯先生今為青城真人

漱龍胎而死訣飲瓊精而叩棺者先師王西

城及趙伯玄劉子先是也王君昔用劍解非龍胎諸丹恐瓊精

即是曲晨耳服金丹而告終者臧延甫張子房墨

狄子是也挹九轉而尸臯吞刀圭而蟲流司

馬季主甯仲君燕昭王王子晉是也

桐栢亦用劍解

當是此吞刀圭者非九轉也司馬季主亦以靈丸作兵解故右英云頭足異處燕昭學仙而不見別跡景純云无靈炁則為朱究其事矣周穆王北造崑崙之

阿親飲絳山石髓食玉樹之實而方墓乎汲

郡此則穆天子傳所載見南王母時也夏禹詣鍾山啖紫柰醉

金酒服靈寶行九真而猶葬於會稽此事亦出五符

中茅傳又云受行玄真之法北戎長胡大王獻帝舜以白

琅之霜十轉紫華服之使人長生飛仙與天

地相傾舜即服之而方死葬蒼梧之野此諸

君並已龍奏靈阿鳳鼓雲池矣而猶尸解託

死者欲斷以生死之情示民有終始之限耳

豈同腐骸太陰以肉餉螻蟻者哉直欲遏違

世之夫塞俗人之願望也古來英聖之王唯未見顯堯及湯得

道及鬼官之迹耳至於青精先生彭鏗鳳綱南山四

皓淮南八公並以服上藥不至一劑自欲出

處嘿語肥遁山林以遊仙為樂以升虛為戚

非不能登天也弗為之耳此諸君自展轉五

嶽改名易貌不復作尸解之絕也鏗則彭祖名也青精

亦出彭傳及王君傳飢飯方軒轅自採首山

中鳳綱并諸仙人各有別顯軒轅自採首山

之銅以鑄鼎虎豹百禽為之視火參鑪鼎成

而軒轅疾崩葬喬山五百年後山崩空室無

尸唯寶劍赤舄在耳一旦又失所在也列仙傳云

御龍攀髯及子晉馭鵠並為不同亦可是化後更出而為之也玉子者帝侖

也曾詣鍾山獲九化十變經以隱遁日月遊

行星辰後一旦疾崩營塚在渤海山夏中衰

時有發王子墓者室中無所有唯見一劍在

北寢上自作龍鳴虎嘯之聲人遂無敢近者

後亦失所在也

帝侖則堯父外書作譽字

王子喬墓在京

陵戰國時復有發其墓者唯見一劍在室人

適欲取視忽飛入天中也欒巴昔作兵解去

入林慮山中積十三年而後還家今在鵠鳴

赤石山中

漢書云巴為桂陽豫章太守後下獄死當仍是用靈丸解云也亦出

仙傳中

右此三條皆出掾寫劍經中經非可輕

見既是說諸仙人事迹隱居謹抄出以

相輔類耳

至人焉在朕曜南辰含靈萬世乘景上旋化
成三道日月為隣實玄實師號曰元人變成
三老友帝之先安知至人不有來遊觀化兆
間混俗為儔釋羽沈鈴安此南堦豈將好兆
滌俗久留七聖玄紀中云赤君下教變迹作沙門與六弟子俱皆顯姓名也
為世滌俗不適生期赤怪潛駭三柱為災賢
者南遊三嶽是之玄君來行人其誰知赤怪則熒惑星也三柱者五車星中三柱也陟屺反
在元炁為元君在玄宮為玄師在南辰為南

極老人在太虛為太虛真人在南嶽為赤松

子此乃天帝四真人之師太一之友此四條是長史

抄出不審本是何經書中事並是說南嶽赤君下教之旨師友之目小異諸經

桐栢山高萬八千丈其山八重周迴八百餘

里四面視之如一在會稽東海際一頭亞在

海中金庭有不死之鄉在桐栢之中方圓四

十里上有黃雲覆之樹則蘇珩琳碧泉則石

髓金精其山盡五色金也經丹水而南行有

洞交會從中過行三千餘里則得此山今在剡及臨海

數縣之境亞海中者今呼括蒼在寧海北鄞縣南金庭則前右弼所稱者此地在山外猶如金靈而靈竒遇之今人无正知此處聞採藤人時有遇入之者鳴喚甚多自可尋求然既得已居吳安能復覓越所以息心桐栢真人之官自是洞天内耳

紫微夫人言

右一條某書

八滄山高五千里周市七千里與滄浪方山相連比其下有碧水之海山上有乘林真人鬱池玄宮東王公所鎮處也此山是琳瑯衆玉青華絳實飛間之金所生出矣在滄浪山

之東北蓬萊山之東南

此即扶桑大帝所居也方山即方丈山也

海中山名多載在五嶽序中耳

方丈之西北有陰成大山滄

浪西南有陽長大山山周迴各一千四百里

高七百里其山多真仙之人所居處焉此二

山是陽九百六曆數之標揭也百六之運將

至則陽長水竭陰成水架矣陽九之運將至

則陰成水竭陽長水架矣頃者是陰成山水

際已高九千丈矣百六之來無復久時

陰成水際

出山高則是高乃應云陽九而言百六似是誤言亦可起際如此高非先水退際爾

但水性平又非湍瀨二山相去不遠未解那得頓孤懸如此

右二條有長史寫

未至廟第一高山西頭龍尾北汧洪水一所發地長六丈餘廣五丈入土六尺水流勢捷地二百餘步去路三里對廟後第二高山西頭汧洪水一所發地長四丈餘廣三尺餘入土四尺水勢捷地三百餘步去路二里近廟後汧脇一所洪水發地長五丈餘廣四丈餘入地二尺餘水勢流入汧中去廟一百五十

步

右蔣山北凡三處發洪水流勢西北行此

條是異迹既不梵真手未審是非又不知此發洪當是何時事山南乃經有發處以積石塞之世呼為蔣侯飲馬汧而山後不見有此或當是將來期運之時乎

真誥卷之十四

真誥卷之十五

梁華陽隱居陶弘景撰
明震維居士俞安期校

闡幽微第一

羅豐山在北方癸地

此癸地未必以六合為言當是於中國指向也

則當正對幽州遼東之北北海之中不知去岸幾萬里耳

山高二千六百

里周迴三萬里其山下有洞天在山之周迴一萬五千里其上其下並有鬼神宮室山上有六宮洞中有六宮輒周迴千里是為六天

鬼神之神也

周迴一萬五千五百為宮周迴一千里者三百二十五所今此

六宮止得六所爾其餘空尚三百一十九所計不容頓耳恐所言或有舛漏處也

山

上為外宮洞中為內宮制度等耳

此山既非人跡所及

故山上可以得立容不知山復有幾洞門也

第一宮名為紂絕陰天宮以次東行

以周迴論之洞

中直東西有三千七百五十里今一宮周迴二里是徑二百五十里六宮若併列合居千五百里耳其兩邊各餘二十餘里南北有殊遠悉當為藩屏故也不爾莫測所以也

第二宮名為泰煞諒事宗天宮

第三宮名為明晨耐犯武城天宮

第四宮名為恬昭罪氣天宮

第五宮名為宗靈七非天宮

第六宮名為敢司連宛屢天宮

凡此六天宮亦皆應有義

旨乃粗可領解自不容輕說

凡六天宮是為鬼神六天之治也洞中六天

宮亦同名相像如一也

此即應是北豐鬼王決斷罪人住處其神

即應是經呼為閻羅王所住處也其王即今北大帝也但不知五道大神當是何者爾凡

生生之類其死莫不隸之至於地獄所在盡有不盡一處泰山河海亦各有焉此山外宮

當是曹局職司主領文簿洞中內宮是住止及考謫之處也今書家說有人死而復生者

並云初北向行詣官府考署或如城闕檢課
文書恐此皆是至山上外宮中爾如胡母班
往泰山府君處亦不覺入洞中
恐鬼神恍惚不使知見實事耳
世人不知

都六天宮門名則百鬼不敢為害欲卧時常

北向祝之三遍微其音也
前云宮名今云門名是為門亦因宮

為名宮直是虛號門則有榜題百鬼皆見而人今亦知之故所以畏伏也祝曰吾

是太上弟子下統六天六天之宮是吾所部

不但所部乃太上之所主吾知六天之宮名

故得長生敢有犯者太上當斬汝形
此云下統六天

者不為六天所統也不但吾自所部領乃太上令吾主之故復以為威猶如郡縣官爵有

臺除非白
版之例也
第一宮名紂絕陰天宮以次東行

第二宮名
此二字楊君書際紙下如此搽寫不熟詳乃作七字今世中諸本皆

作第七此誤爾宮唯有六豈容是有七耶此呪復說以次東行四字者是欲令鬼輩訝吾

知其次第從此以次訖六宮止乃咏齒六下

乃卧辟諸鬼邪之氣
此一遍呪訖六咏齒畢又呪如此三過乃卧耳

此法已重抄在第三篇修事中耳人初死皆先詣紂絕陰天

宮中受事或有先詣名山及泰山江河者不

必便徑先詣第一天要受事之日罪考吉凶

之日當來詣此第一天宮耳
此宮是北帝所治故後悉應關

由猶如今州縣之獄初雖各有執隸終應送臺定其刑書泰煞諒事宗天

宮諸煞鬼是第二天也卒死暴亡又經於此

此宮當得專主收煞也其卒死暴亡恐文書未正或姓名相同者所以先來檢問之也

賢人聖人去世先經明晨第三天空宮受事後云

四明公各治一宮不知此泰煞明晨兩宮當是何公所居暴亡及賢聖雖先暫經亦猶應詣紂絕禍福吉凶續命罪害由恬昭第四天

宮鬼官北斗君治此中鬼官之北斗是復籍先身之

功罪乎然武以至忠而亡必復入仙品矣韓太華者韓安國之妹

也漢二帥將軍李廣利之婦也利宿世有功

德利今亦在南宮受化廣利為漢武名將伐大宛時所殺戮殊不

少以先世功德遂能消之韓氏字安國家福逮不應關李相扶夫妻既同條恐人脫致疑

是以復標別言之亦或由因結致此也劉春龍者漢宗正劉奉

先之女奉先漢某帝時為宗正李奚子者李忠之祖母

也忠晉初東平太守忠祖父田舍人耳而多

行陰德常大雪寒凍而不覆積稻常露穀於

園庭恒恐鳥雀饑死其用心如此李忠不顯晉書如此

說則妻復似是緣夫之功而夫王進賢王衍

身反不見有所果亦難可詳言王進賢王衍

女也事詳在後郭叔香者王脩母王脩字叔治北海人為魏武郎

中今年七歲喪母母以社日亡不知是郭誰女也 其童初府有王少

道范叔勝李伯山皆童初府之標者少道漢

時人王遜兒也漢時山陽太守范叔勝北地

人也魏文帝黃門郎李伯山李冲父也冲漢

時為白馬令行陰德或積世有道中行所鍾

此二府仙人皆一進再進得入此項梁城作

酆宮誦曰

紂絕標帝晨諒事遘重阿炎如霄中煙勃若

景曜華武陽帶神鋒恬昭吞青河閻闔臨丹

井雲門鬱嵯峩七非通竒蓋連宛亦敷魔六

天橫北道此是鬼神家

誦有二萬言今略道六天之宮名抄出之耳

夜中亦可微讀之亦云辟鬼邪前第三宮名武城今云武

陽或當是有兩名也蘇韶傳云鬼之聖者有項梁城賢者有吳季子但不知項是何世人也或恐是項羽之叔項梁而不應聖於季子也

酆都稻名重思其米如石榴子粒異大色味

如菱亦以上獻仙官後又有敘重思事既異日所說兩出自非嫌

石榴子即世之安石榴也

炎慶甲者古之炎帝也今為北太帝君天下

鬼神之主也炎帝神農氏造耕稼嘗百藥其聖功不減軒轅顛頊無應為鬼

帝又黃帝所伐大庭氏稱炎帝恐當是此非神農也又外書云神農牛首今佛家作地獄

中主煞者亦牛首復致疑焉四明公升擢既有年限太帝位秩亦應加崇極此雖已三千

餘年或恐如世中帝王不轉而公輔屢遷也

武王發今為鬼官北斗君文王之子周武王也姓姬名發伐殷

紂而為天子即位二年崩禮云年九十三竹書云年四十五按後云四明公並得昇仙階

而不道北斗君既仰隸玉晨亦應預同遷品耳

夏啓為東明公領斗君師禹之子也姓姒竹書云即位三十九

年亡年七十八自崩滅後至今已卯歲允二千四百二十五年按司命說格在位二千四

百年得上補九宮如此則宋元徽四年去矣

文王為西明公領北帝師文王名昌禮云年九十七亡此父子

並得稱聖德而不免官鬼雖為煞戮之過亦當是不學仙道故也

邵公奭為南明公邵公名奭文王庶子食采於邵封於燕國按周公邵

公太公俱佐命尅紂公在不殊而周公有聖德仙鬼之中並無顯出太公執旄秉鉞威罰

最深乃載出列仙邵公恩流甘棠翻為鬼臧亦復難了皆當各緣其根本業分故也豐都

唯有六宮而周文王父子頓處其三明周德之崇深矣

吳季札為北明公吳王壽夢之少子闔閭之叔父太伯之後也亦姬姓

吳王壽夢之後也亦姬姓

讓國居乎延陵今季子廟是也雖有仁賢之德乃亞乎先聖亦有殊例尋此諸公前後參差當是道時代謝用人也自夏啓已來二千餘年方得遷改乃十倍於地下主者之數明仙家品例故為貴妙

四明公復有賓友四人然此四公後並當升

仙階也四明主領四方鬼賓友四人其事在後又按後定錄告

云邵奭為東明公行上補九宮右保此乃仙階之證而與前不同且啓尚未去邵理不得

仙恐脫耳誤云邵耳既云東明公則應猶是啓也其疑事別在後也

西明郎十六人主天下房廟鬼之血食此郎亦應

是隸西明公房廟血食是受命居職者非謂精邪假附也

周顛為鬼官司命帥今以鄧岳程遐二人代

以其多事故也周顛字伯仁汝南安城人仕晉過江位至尚書僕射元帝

永昌元年王敦南下遣收於石頭南門被害年五十四追贈光祿開府謚康侯鄧岳字伯

山陳郡人討郭默有功咸寧初為平南將軍廣州刺史於州病亡辛亥子後云鄧岳為謝

幼輿司馬此當是已遷也程遐代郡人為石勒謀臣妹為勒妻官至右僕射開府代郡公

勒死為石虎所煞也

西明都禁郎賈誼昔為治馬融事不當被黜

守泰山泰山君近請為司馬已被可賈誼前漢文帝

時為梁孝王傅憂憤嘔血而死後云荀顛為泰山君用曹洪為司馬今當代曹也馬融字

季長扶風人也博學有才理鄭玄之師也仕後漢為南郡太守未嘗按劍殺人忤梁冀被徙朔方於路自刺不死後赦還拜議郎延壽九年病亡年八十九融別傳復小異此耳

南門亭長今用周撫代郗鑒一門有二亭長

輒有四修門郎一天門凡八修門郎也門郎

為天門亭長下官此是北帝門也後漢云主南北門籥

則一宮有二天門也蘇韶傳云修門郎有八人乃言顏淵卜商今見居職恐此不然周撫

字道和潯陽柴桑人周魴子也先為王敦將東下伐都事敗與鄧岳俱走西陽蠻中敦被

殺赫出又為將討蘇峻後伐蜀平李勢封建成公為鎮西將軍益州刺史乃三十許年與

寧三年病亡贈征西將軍謚襄公郗鑒字道微高平人即愔父也永昌元年率諸流民來

渡江東後討平王敦封高平公又為車騎大將軍兖州刺史鎮廣陵復鎮徐州蘇峻平拜

司空改封南昌公猶鎮京兆城咸康五年病亡年七十一也贈太宰謚文成公也

北斗君天門亭長今是臧洪臧洪代隗囂又

一人是王波新補此亦正是南門爾其餘四明公四宮門亦應大有並

不顯出臧洪字子源廣陵射陽人慷慨有節義漢末洪舉義兵誅董卓後為青州及東郡

太守背袁紹紹攻圍食盡被擒乃害之隗囂字季孟天水人有才德為物所附前漢末據

隴西自稱王建武元年光武伐之憤逼得病兼餓遂亡王波渤海人也晉尚書金史有才

能投石虎為中書監被殺

紀瞻本為撫河將軍司馬今為北天修門郎

代田錄瞻與虞潭更直一日守天門

北天猶應是北

帝門也紀瞻字思遠丹陽句容人初仕吳為中郎將吳平還洛舉秀才稍遷為會稽太守遷侍中尚書僕射驃騎將軍泰寧三年病亡年七十二贈開府謚穆侯田錄魏武帝時為程昱參軍後為河間太守反叛為閻柔所破爾虞潭字思奧會稽餘姚人即虞番孫也位至衛將軍右光祿開府武昌侯咸陽八年病亡年七十贈光祿謚孝列侯也

魏釗領廬山侯

釗字君思會稽人仕晉成穆公世司徒左長史丹陽尹至

左民尚書平壽侯永和七年病亡矣

顧和從遼東戍還有事已散北帝當用為執

蓋郎蓋郎范明遷補典柄侯

顧和字君孝吳郡人少孤有志

操仕晉為吏部侍郎御史中丞吏部尚書領軍尚書僕射尚書令永和七年病亡年六十四贈侍中司徒謚穆公外書不顯范明唯前漢有范明友恐非是此人又誥試許先生者稱典柄侯周魴主非吏者嚴白虎尋典柄侯猶應是典柄呼之脫到爾周魴字子魚吳郡陽羨人周處父也仕吳為鄱陽太守甚有威惠嚴白虎者吳郡人也以孫策時入山聚眾策討之乃散奔餘杭死弟名輿亦勇健策偽與會乃戟刺殺之爾

殷浩侍帝晨與何晏對

此有八人事在後殷浩字淵源陳留長平

人康帝建元初為揚州刺史永和六年進中軍將軍都督五州北伐姚襄敗還為桓溫所廢徙東陽永和十二年以憂亡善能譚論故與何晏對也晏字平叔何進孫善言玄理位至侍中尚書黨曹爽為司馬宣王所誅

温太真為監海開國伯治東海近取杜預為

長史位比大將軍長史温嶠字太真太原祁人仕晉為江左平南

將軍江州刺史下平蘇峻位至驃騎將軍開府封始安公咸和四年病亡年四十二贈太

將軍諡中武公杜預字元凱京兆杜陵人博識多智注春秋仕晉起家尚書郎位至都督

荆州鎮襄陽伐吳有功封當陽侯太康五年還洛於鄧縣病亡年六十三葬洛陽贈征南

大將軍諡成侯

何次道始從北帝內禁御史得還朱火宮受

化以其多施惠之功故也後辛亥子亦云如

潛人位至尚書令驃騎將軍除揚州刺史錄尚書輔正世業奉佛多施惠立功德每為善

事以永和二年正月戊寅病亡年五十五贈

司空諡文穆公按如此旨鬼職雜位非四明

公而猶得受化朱宮升居仙品者此當是深功厚德之所致也

魏武帝為北君太傅北君則北斗君周武王

斗君不置此職當以太傅准之魏武帝曹操沛國譙人英雄撥亂匡定天下封魏王加九

錫獻帝建安二十五年正月病亡年六十六此年十月魏文仍受禪追贈太祖武皇帝也

其餘多不能復一二蓋鬼神之事不足示於

世也荀公言也荀公即是荀中侯既隸司命

參差前後遞互如似隨問隨答非自然敘述事也世人多不信幽冥鬼神故戒勿宣示若致疑謗益漏失爾右此前一段所說不記何年月以後王逸少事檢之則猶應是乙丑年

真告

人卧牀當令高高則地氣不及鬼吹不干鬼

氣之侵人常依地而逆上鬼者陰物多因藉以宣其氣或附人

畜或依器物或託飲食然後得肆其凶毒耳昔有人病在地卧於病中乃見鬼於壁穿下

以手為管而吹之此即鬼吹之事也

人卧室宇當令潔盛潔盛則受靈炁不盛則

受故炁故炁之亂人室宇者所為不成所作

不立一身亦耳當洗沐浴潔不爾无冀矣炁故

皆謂鬼神塵濁不正之炁此等皆承人為惡既靈助無主道豈可議也

勿道學道道學道鬼犯人事亦不立使人病

是體未真故也真誥亟多此戒云一言一事泄乃減算豈但疾病而已所謂仙者心實學何趣說之耶群魔伺察有如影響也

山世遠受孟先生法暮卧先讀黃庭內景經

一過乃瞑使人魂魄自制練但行此道二十

一年亦仙矣是為合萬過也得三四過乃佳

北嶽蔣夫人云讀此經亦使人無病是不死

之道也此四條並是可承用事已別抄在第三篇中孟先生即應是京兆孟君及

屬用鄭承者前篇有西嶽蔣夫人今又云北岳未審有兩人為是誤也

夜行常琢齒琢齒亦無正限數也煞鬼邪鬼

常畏琢齒聲是故不得犯人也若兼之以漱

液祝說亦善叩齒即神存故鬼邪不得于今

以並得昔鮑助者濟北人也助既卑微都不

學道亦不知法術年四十餘忽得面風氣口

目不正烝入口而兩齒上下恒相切拍甚有

聲響如此晝夜不止得壽年百二十七歲後

乃遇寒過大冰墮長壽河中死耳北帝中間

亦比遣煞鬼及日遊地殃使取之而此數煞

鬼終不敢近助鬼官問其故天煞答云此人

乃多方術以制於我常行叩齒鳴打天鼓以

警身中諸神神不敢散鬼氣不得入是以无

有緣趣得煞之耳以此論之若助不行冰渡

河亦可出千歲壽不啻也當是遇大寒凍步

行冰上口噤不能復叩齒是故鬼因溺著河

中耳患風病而齒自叩動者猶尚辟死却煞

鬼矣何患道士真叩齒鳴天鼓具身神耶方仙

云常吞液叩齒使人反少以此而言人命便

无定限一切皆是天遏耳若修道精勤如鮑

助啄齒何容不得永年正患有時懈替則爲鬼所襲同於溺河之斃也凡諸鬼亦是不能靈智乃以風病爲多術豈勝謬邪

酆都山上樹木水澤如世間但稻米粒幾大

味如菱其餘四穀不爾但名稻爲重思耳杜

瓊作重思賦曰霏霏春茂翠矣重思靈杰交

被嘉穀應時四節既享祝人以祀神禾鬱乎

浩京巨穗橫我玄臺爰有明祥帝者以熙此

之謂矣此更說酆都中事仍復及重思耳說祝人有祠者不容有蒸嘗之義當卽

是前所云獻奉仙官故也又鬼年限足應受餘生亦復死便有祠事矣杜瓊字伯瑜蜀人

也博學有才思注韓詩兼明數術逆記魏當代漢仕劉禪時爲鴻臚太常延熙十三年亡年八十餘耳

侍帝晨有八人徐庶龐德爰愉李廣王嘉何

晏解結殷浩並如世之侍中李廣漢武驍騎將軍征匈奴時

被吏譴憤慨自刎而死王嘉蜀郡人平帝時爲郎中至王莽乃棄官還鄉不肯臣公述伏

劍而死徐庶字元直潁川人薦諸葛亮於劉備後魏武虜其母乃歸魏仕至中丞明帝大

和中病亡龐德字令明南安人隨張鎮南降魏武拜立義將軍屯樊城爲關羽所害謚杜

侯迎喪葬鄴身首如生爰愉字世都濮陽人有才辨多術藝事晉武辟司徒魏舒府位至

侍中中書令監解結字稚連濟南人係弟也一仕晉黃門侍郎中丞荆豫州刺史尚書趙

真浩

王倫時為孫秀所害也何殷二人以注在前
前所說唯道二人今當是更請問乃悉具顯
之

四明公及北斗君並有侍帝晨五人其向者

八人是北大帝官隸耳選用亦同侍帝晨之
號仙官亦

有俱是侍中位也此言選用並同不知止取
各位當品才識兼論功德耶此諸人才位永
不相類恐幽途所
詮別當有以耳

又有中郎直事四人如世之尚書也戴淵公

孫度劉封郭嘉今見在職封者是玄德之養

子此職應是太帝領僚如今散曹尚書耳戴
淵字若愚廣陵人也仕晉歷位至護軍尚

書僕射驃騎將軍與周顛俱為王敦所害贈
光祿謚簡侯公孫度字叔濟遼東人淵之祖

也初為遼東太守建安中遂借號稱王建天

子羽儀傳國子康至孫淵被司馬宣王所煞

劉封本羅侯寇氏子劉備未有兒養為息性

剛猛有氣力武藝後建節度賜死此異族為

嗣亦是仍得襲姓也郭嘉者字奉孝穎川陽

翟人魏武謀臣為軍謀祭酒病亡年三十八

謚真侯也

玄德今為北河侯與韓遂對統今屬仙官仙
官

又有北河司命禁保侯亦司三官中事乃隸
東華官保命君領之此則是北河侯必是相
統屬矣劉備字玄德涿郡人初起義兵後遂
據蜀稱尊號三年病亡年六十三謚昭烈皇
帝尋于時同為三國之主魏武孫策今位任
皆高劉此職雖小而隸仙官其優劣或可得

相匹也韓遂字文紂某某人漢末阻兵構亂西土建安二十五年魏武伐之奔金城之內為其將趨演等所害遂乃驍雄而未免寇難乃得與劉備對仕殊為不類兼隸仙官益復也超顯也

又有大禁晨二人如今尚書令漢光武及孫

文臺二人居之

光武劉秀字文叔高祖八代孫起兵討王莽赤眉平定天

下即位三十三年病亡年六十三孫堅字文臺吳郡人策父也表術表為破虜將軍豫州刺史討董卓後伐劉表初平二年為表將軍黃祖部下人所射亡年三十七堅雖忠烈而位微今與天子同職亦似韓遂之匹玄德也

又有中禁晨如今之中書令監有二人顏懷

楊彪二人居之懷字思季彪字文先者

顏懷字思

季未德此人楊彪字文先弘農人漢司空楊修父也值董卓悖亂扶濟獻帝東西危苦備經三司至魏文黃初六年乃亡年八十四

許長史父今為彈方侯彈方侯有二人各司

南北許長史為南彈方侯劉贊為司馬鮑勛

為北彈方侯韋遵為司馬亦各主南北門籬

許領威南兵千人鮑勛領威北兵千人大都

備門主收執而已如今世有羽林監威南威

北兵如道家天丁力士甲卒之例也

二禁晨及南北

彈方侯亦應並是北帝官屬也受此語時未必不呼許名恐是楊自不疏之耳北帝呪所謂威南威北即謂此兵當是驍勇者也許氏事具在別篇劉贊字正明會稽長山人少為郡吏好讀兵書慷慨有大志擊黃巾賊傷足一脚屈遂自割筋得伸後為左護軍與孫峻征淮南未至病困為魏將蔣班所逼被害年七十三鮑勛字叔業鮑宣九世孫即鮑信子也清白有高節漢建安中為中庶子黃門郎魏文帝御史中丞數諫諍忤旨左遷治書執法後被誅韋遵字公藝吳人即韋昭之孫也博學有文才善書仕晉成穆之世為尚書左民郎中書黃門侍郎代王逸少為臨川郡守以母憂亡年六十四也

孫策為東明公賓友

孫堅長子字伯符漢末嗣父領眾先制江東乃

欲定中國拜討逆將軍封吳侯臨過江輕獵為仇客所射瘡發而亡年二十六弟權代任後追謚長沙桓王策初從東出煞道七千吉後照鏡見之驚忿叫故瘡潰而死尋項羽之英傑逾於孫遠矣俱是不得王而獨不顯出乃歷世相傳云為吳興十山王常居郡廳上故太守不敢上上者輒死亦別為立廟呼為霸王也



真語

卷之十五

六

真語卷之十五終



